

Kö'du Yöyö Laka 'ba Yësu ma Yowani ayöru

Me'do 'ba Didi

¹ Mi biyeto aba Me'do edi. Me'do ne edi Wirä aba ehe tinyö Wirä ra.

² Tëmi biyeto, Me'do ne edi Wirä aba.

³ Ehe Me'do nenyë aba, Wirä o'do wa biya. Wa maako o'do dë kazi Me'do ne.

⁴ Didi ayi kazi mo, ehe didi 'bomo i'di bikanyi zi vidi biya.

⁵ Bikanyi ne asesi tanyi mi biköndu, ehe biköndu ayölu dë.

⁶ Wirä utu kora maako ru mo Yowani.

⁷ Mo ayi zi yada kö'du 'ba bikanyi ehe zi gaga vidi biya zi tedi koma aba.

⁸ Yowani ra dë bikanyi nenyë. Mo ayi nje zi yada kö'du 'ba bikanyi ne.

⁹ Bikanyi tinyö mati ayanyi bi da vidi biya, edi tayi mi damöku ne.

¹⁰ Me'do ne edi mi damöku ne, mora vidi maako ayölo mo dë, Wirä o'do damöku ne le me'do 'bomo aba.

¹¹ Mo ayi gogo mi damöku 'beni, mora vidi 'bomowe irinni mo dë kalakyedre aba.

¹² Vidi maakowe ombanni mo ehe i'di koma 'benni mi mo. Here mo i'di dangölo zi zë, zi tedinni na gisi 'ba Wirä.

¹³ Zë anzanni dë gisi 'ba Wirä, ta da rë zë, mandere ga kö'du komba 'ba vidi köndu,

mandere kö'du komba 'ba o'di. Wirī ra na bi dē nī o'do zē na gisi 'bēnī.

14 Me'do ne ayi na vidī köndu, ehe alima kinye ze aba. Dongo ze bikanyi kyedre tinyō 'bomo, bikanyi kyedre 'ba Wisi nje kölō 'ba 'Bu. Mo ndo rakyēyī ehe tinyō.

15 Yowani ame'do kö'du mo ehe agbögbö, “Nenye mo mati ma yada zi ye atayi! Mo kyedre ta da ma, ga kö'du mo ēdī na wīdī gba kazi ma ko'jo.”

16 Kazi rakyēyī 'bomo dirī ze ya'da kayo

17 Mosa ra i'dī kö'du kī'dī, mora Yēsu Korisitō ika zi ze kö'du laka tinyō aba.

18 Vidī maako gba ongo Wirī dē. Nje Wisi kölō ne mo ra tinyō Wirī ehe ēdī kara ra 'Bu, ayada zi ze Wirī ēdī kaa a'di.

Kö'du kise 'ba Yowani Bapatisi

(Mt 3:1-12; Mk 1:1-18; Lk 3:1-18)

19 Vo kalakonda vo yēnī 'ba Yude mī Yerusalema utunnī vo karasa maakowe ehe Lēviyē zi ha Yowani ko'jo mo 'bēnī ēyī.

20 Mo omba do mo ayada zi zē huwē tinyō henye, “Manza dē Korisitō ne.”

21 Neene zē ako'jonnī ho mo, iyannī henye, “Yī Eliya ra?” Yowani aya'ba henye, “Manza dē.” Zē ako'jonnī ho mo iyannī henye, “Yī ra Nēbī ne?” Mo aya'ba henye, “E e!”

22 Ndundu mo aba, zē iyannī henye, “Ayada zi ze, yī 'bēyī ēyī?” Zē iyannī henye, “Zi ze koba hulēhu da kö'du ya'ba 'bēyī ne zi vidī mati utunnī ze.”

²³ Yowani aya'ba da me'do tëmī me'do kiya 'ba nēbī Yisaya. “Ma nje vīdī ma ēdī mbere mī da lipī, ‘O'de gērī nzo zi Yere!’ ”

²⁴ Kya 'ba Farasi maakowe utunnī zē kpa zi Yowani.

²⁵ Zē ako'jonnī hō mo, iyannī henye, “Kō'du a'di ēdī vīdī bapatisi, ēzē anza dē Korisito mandere Eliya mandere Nēbīe?”

²⁶ Yowani ayada zi zē iya henye, “Mo'do bapatisi wini aba, mora ēdī yē aba kinye, vīdī maako ayole dē.

²⁷ Mayi le dagba, manza dē na laka zi kamoka 'bomowe kinga.”

²⁸ Yowani iya nenye mati mo ēdī bapatisi kī'dī humirē 'ba Ranga Yeredene mī Beteniya.

Timēlē 'ba Wiri

²⁹ Mī ko'do ma ta go mo, Yowani ongo Yēsu ēdī tayi zi nī, ehe iya henye, “Kinye ēdī Timēlē 'ba Wiri mati oba kō'du yaṅa 'ba damōku ne 'de.

³⁰ Mo ra mati ma yada kō'du mo zi ye henye, ‘Vīdī maako atayi kpa, mo kyedre ta da ma, ga kō'du mo ēdī na wīdī gba kazi ma ko'jo.’

³¹ Ma yolo dē, mo 'bēnī ēyī. Mora mayi zi ye bapatisi wini aba, here vīdī biya mī Yiserele akongo mo.

³² Ma mēdī ani ehe mongo Lawo Laka ayi akaṅo do mo kaa atu'bu ta komoriyē, ehe Lawo Laka ne alima do mo.

³³ Gba kazi nenyē ma yolo dē ēyī 'bēnī mo. Mora mo mati utu ma zi bapatisi kī'dī wini aba ne ayada zi ma henye, ‘Akongo Lawo Laka tayi akaṅo ehe lima da vīdī maako. Neene akayolo

henye, mo ra vidi mati aki'di bapatisi Lawo Laka aba.'

³⁴ Mongo nenye o'do re ni, ehe ma yada zi ye henye, mo Wisi 'ba Wiri ra."

Dagba vo lo'bowe 'ba Yesu

³⁵ Ko'do vere aba, Yowani edi ani lohu ehe vo lo'bo 'bomowe riyö edinni mo aba.

³⁶ Mati mo ongo Yesu lasi ta dakapa, mo iya henye, "Kinye edi Timele 'ba Wiri!"

³⁷ Vo lo'bo 'ba Yowani riyö owonni me'do 'bomo ne, ehe ze i'benni Yesu aba.

³⁸ Mati Yesu opi re ni ehe ongo ze, mo ako'jo ko'du henye, "A'di ra ombe?" Ze aya'banni do mo iyanni henye, "Raboni, alima kila?" Mi ha 'ba Hibiru, "Raboni ne," "Vo komoyandi" ra.

³⁹ Yesu aya'ba do mo iya henye, "Ayi onge te." Edi ku nzo kaa kadra sowo mi kadra kutë mati ze i'benni mo aba ehe ongonni bi ma mo alima 'domo. Here ze alimanni nduwë mi ndundu 'ba kadra ne.

⁴⁰ Kolo temi kora riyö ma owo ha Yowani ehe i'be Yesu aba ra Anderiya, öndu 'ba Simona Petero.

⁴¹ Dagba ko'du mati Anderiya o'do, edi zi koma öndu ni ehe yada zi mo henye, "Di'ja Masiya ne ku!" Mi ha 'ba Hibiru, "Masiya ne" kpa te kaa mi ha 'ba Girigi "Korisito ne."

⁴² Anderiya ika öndu ni zi Yesu. Mati Yesu ongo mo, mo iya henye, Simona wisi 'ba Yowani, akako'jo yi Kapahasi. Ru nenye ato'bo kidra na "Petero."

Yesu ako'jo Pilipo ehe Natanele

43-44 Mī ko'do vere aba Yēsu omba zi tì'bē Galilaya. Ani mo i'ja Pilipo, mo ta Beteseyida, gawo liṅɔ 'ba Anderiya, Petero aba. Yēsu iya zi Pilipo, “Usu ga ma.”

45 Pilipo i'ja Natanələ ehe iya henye, “Di'ja ze vere mati Mosa ehe Nēbiyē ayōrunni kō'du mo ne ku. Mo Yēsu, wisi 'ba Yosepa ta Nazereta.”

46 Natanələ ako'jo kō'du iya henye, “Wa laka maako atɔ'bo tayi ta Nazereta?” Pilipo aya'ba dɔ mo iya henye, “Ayi ongɔ te.”

47 Mati Yēsu ongɔ Natanələ ēdī atayi zi nī, mo iya henye, “Kinye ēdī tīnyō kozo zutu 'bezee 'ba Yiserere, ehe mo anza dē na vo wakoba.”

48 Natanələ ako'jo hɔ mo iya henye, “Hala ayɔɔ ma?” Yēsu aya'ba dɔ mo iya henye, “Gba kazi Pilipo yī ko'jo, mongɔ yī hu kaga kyēlu.”

49 Natanələ iya henye, “Raboni, yī Wisi 'ba Wiri ehe Yere 'ba Yiserere!”

50 Yēsu aya'ba dɔ mo iya henye, “Oma mī ma nje ga kō'du mati miya henye, mongɔ yī hu kaga kyēlu? Akongɔ wa maako kyedre ndra ta da ma nenyē.

51 Ma yada zi yī, akonge komoriyē akayēhu rē nī ehe malayike 'ba Wiri tì'bē riyē ehe tayi akaṅɔ da Wisi 'ba Vidi.”

2

Oze mī Kana

1 Ko'do wota aba yaa Mariya, ma 'ba Yēsu ēdī mī karama 'ba rakoze mī gawo 'ba Kana mī Galilaya.

2 Yēsu vo lō'bo 'bēniyē eti, ise zē kpa bi 'ba rakoze ne.

³ Mati a'ji inde rē nī ku biya, ma 'ba Yēsu iya zi mo henye, “Zē anzannī kpe a'ji aba.”

⁴ Yēsu aya'ba dɔ mo iya henye, “Ma ma, ayada dē zi ma a'di ra zi ko'dɔ. Kadra 'bama gba ɔko dē.”

⁵ Ma 'ba Yēsu ayada zi vo lituwē 'ba liɲɔ henye, “O'de wa mati mo ayada zi ye ko'dɔ.”

⁶ Yude ēdinnī kō'du kira 'ba wa kaka ɲbala aba ehe ga kō'du nenyē, tele yītō 'ba wini ēdī ani modaka ma kōlō ēdī kyedre zi kīrī kaa lita lamikōlō.

⁷ Yēsu iya zi vo lituwē 'ba liɲɔ henye, “Osowe tele nenyee wini aba.” Zē osonnī zē kpika

⁸ ehe mo ayada zi zē henye, “Yaanya aba oba kya 'ba wini ne yaga ehe i'dī zi kora vo kyeti karama ne.” Zē obannī wini ne zi mo

⁹ mati yaanya aba ofɔ rē nī ku na a'ji ehe mo anene. Mo ayɔlɔ dē a'ji nenyē ayi ta kila, mora vo lituwē mati obannī a'ji nenyē ayɔlɔnnī, here mo ako'jo 'biyēsī

¹⁰ ne ehe iya zi mo henye, “Vidī biya uwēnnī a'ji ma laka ra dagba, ehe tapētī mo, mati yingɔ ēdinnī ku kyɔ mo aba zi kuwē, mo i'dī a'ji ma kɔɔ ne. Mora asesi wēyī a'ji ma laka ne le yaanya aba!”

¹¹ Yēsu o'dɔ dagba kyīnē 'ba kō'du koro nenyē mī gawo 'ba Kana mī Galilaya. Ani mo ayada bikanyi kyedre 'bēnī, ehe vo lō'bō 'bɔmowe omannī mī mo.

¹² Tapētī ma nenyē, Yēsu ehe ma mo, öndu mowe, ehe vo lō'bō 'bɔmowe i'bēnnī zi Kapanamo, ehe alimannī ani ko'do tisi aba.

*Yësu i'bě mi yëkëlu**(Mt 21:12-13; Mk 11:15-17; Lk 19:45-46)*

¹³ Ēdi ku kadra kara zi karama 'ba Yude 'ba laga 'ba koli, Yësu i'bě zi Yerusalema.

¹⁴ Ani mi yëkëlu mo i'ja vidi ëdinni isa, timelë, ehe atu'buwë kogo, ehe vo kôhi kutrëë kpa limanni da tarabiza 'bënni.

¹⁵ Here mo o'do so'da temi ko'di ehe ore ngötu biya yaga temi yëkëlu, 'dö timelë, ehe isa, mo opi da tarabiza 'ba vidi 'ba kôhi kutrëë, apere kôhi ñbiriri 'bëzë ne,

¹⁶ ehe mo i'di kö'du zi vidi ma ëdinni atu'bu kogo ne henye, “Obe atu'buwë yaga ta kinye! O'de loko 'ba 'Bu ma dë na bi 'ba wakogo!”

¹⁷ Vo lö'bö 'bomowe asösunni henye, wayöru iya henye, “Watowo 'bama kö'du loko 'beyi, o'bo mi ma kaa wa'do.”

¹⁸ Vo kalakonda 'ba Yude aya'banni do mo kö'du ko'jo aba henye, “Kyinë 'ba kö'du koro a'di ra ato'bo ko'do zi yada zi ze edi dangölö aba tinyö zi nenyë ko'do?”

¹⁹ Yësu aya'ba do mo iya henye, “Iha akaño yëkëlu nenyë ehe mi ko'do wota aba ma ko'ba löhu!”

²⁰ Vo dagbe aya'banni henye, “İri koo 'butësowo domomodaka zi ko'ba yëkëlu nenyë. A'di ra o'do yi zi sösu ato'bo ko'ba ko'do wota aba löhu?”

²¹ Mora Yësu edi ame'do kö'du ida rë ni ra na yëkëlu.

²² Mati injë mo ku temi koli, vo lö'bö 'bomowe asösunni kö'du mati ayada zi zë. Neene zë omani mi wayöruwë ehe mi me'do 'ba Yësu.

²³ Mi Yerusalema mi kadra karama 'ba laga 'ba koli, vidi kayo omani mi Yesu, ga ko'du ze onganni mo ta bi kyine 'ba ko'du korowe ko'do.

²⁴ Mora Yesu ayolo ko'du mati mi di'di ze, ehe mo ila ze de zi tedi kyigo aba ndra ta de ni.

²⁵ Vidi maako anza zi yada zi mo a'di ra vidie kaa mo. Mo ayolo ku nzo.

3

Yesu ehe Nikodimo

¹ Ani vo dagba 'ba Yude edi ru mo Nikodimo mo Farasi ra.

² Yondo kole maako aba mo i'be zi Yesu iya zi mo henye, "Raboni, da yolo ku Wiri utu yi zi komo ze yandi. O'bo de kyin 'ba ko'du koro nenyee ko'do, nje ezé Wiri edi yi aba."

³ Yesu aya'ba do mo iya henye, "Medi ko'du tinyo ra yada zi yi vidi maako o'bo de damoku 'ba Wiri kongu kazi mo ko'jo lohu!"

⁴ Nikodimo ako'jo iya henye, "Hala kora ma ovu ku kyedre ne ako'jo lohu? Mo o'bo dekpe todu mi ma ni lohu zi ko'jo mi kadra ma riyö mo!"

⁵ Yesu aya'ba do mo henye, "Medi ayada tinyo zi yi" Vidi maako o'bo de todu mi damoku 'ba Wiri, kazi ko'jo mo wini aba ehe Lawo Laka.

⁶ Vidi kondu o'joni gisi 'benni. Nje Lawo Laka 'ba Wiri o'jo gisi 'ba Wiri.

⁷ Anza de na rakaga ga ko'du mati miya henye, ako'jo yi lohu.

⁸ Lawo 'ba Wiri edi kaa buluku mati aluku bi mati omba ti'be zi mo. Ato'bo kowo kpöo

buluku, mora ayɔɔ də ayi ta kila mandere ëdī tī'bē kila. Ëdī here biya zi vīdī ma o'jo Lawo aba.

⁹ Nikodīmō ako'jo kō'du iya henye, “Hala nenyē atēdī?”

¹⁰ Yēsu aya'ba dɔ mo iya henye, “Hala atɔ'bo zi tēdī na vo komoyandi 'ba Yiserele ehe ayɔɔ wa nenyēe dē?”

¹¹ Ma yada zi yī tīnyō, dēdī ame'do kō'du wa ma da yɔɔ, ga kō'du dongɔ ku na bi de ze. Mora vīdī maako tēmī yē akīrī kō'du kiya 'beze ne dē.

¹² Ëzē oma dē mati ma me'do zi yī kō'du wa 'ba dakaɔ, hala akoma ëzē ma me'do zi yī kō'du wa 'ba komoriyē?

¹³ Vīdī maako gba i'bē dē komoriyē, nje Wisi 'ba Vīdī, mati ayi akaɔ ta ani.”

¹⁴ “Ehe here Wisi 'ba Vīdī akīnjē rīyē, kaa mɔvɔ wiri kōhi mati Mosa injē rīyē mī da līpī.

¹⁵ Neene vīdī biya mati ëdī koma aba mī Wisi 'ba Vīdī atēdī didī ŋburu aba.

¹⁶ Wīrī ɔwɔ damōku nenyē ndra, here mo i'dī Wisi kōlō 'bēnī ne, here vīdī mati oma mī mo ëdī didī ŋburu aba, ehe tīnyō oli dē.

¹⁷ Wīrī utu Wisi 'bēnī ne dē ga kō'du mo omba zi ko'do vurē 'ba damōku, mora ga kō'du mo omba zi yomɔ damōku ne kpuru wisi 'bēnī aba.”

¹⁸ “Zē mati omannī mī Wisi ne, o'do vurē kyēnyē dē rē zē, mora zē mati omannī dē o'do vurē 'bēzē ku nzɔ, ga kō'du omannī dē mī Wisi nje kōlō 'ba Wīrī ne.

¹⁹ Bikanyi ayi mī damōku, mora vīdī ombannī zi lese mī bikōndu ga kō'du zē ëdīnnī kō'du kyēnyē ko'do. Nenyē ra ëdī hala o'do vurē rē zē.

20 Vidī ma ēdīnnī kō'du kyēnyē kō'do, iyinnī bikanyi ehe ayinnī dē zi bikanyi, ga kō'du ayada wa mati zē ēdīnnī ako'do ēdī na kyēnyē.

21 Mora vidī biya ma alima tīnyō aba, atayi zi bikanyi ga kō'du zē ombannī agamowe zi yolo henye, Wiri ēdī kō'do kpuru zē aba.”

Yēsu ehe Yowani Bapatisi

22 Tapētī ma nenye, Yēsu ehe vo lō'bō 'bēniyē eti i'bēnnī zi dakaŋo 'ba Yudiya, bi mati mo alima tisi zē eti ehe bapatisi kī'dī aba.

23 Yowani ēdī kpa bapatisi kī'dī mī Anono anza dē na kowō ta ra Salima, ga kō'du wini ēdī bi nani. Vidī ēdī ti'bēnnī zi mo ehe mo ēdī zē bapatisi.

24 Nenyē gba kazi Yowani kī'dī mī kamba.

25 Kya vo lō'bō 'ba Yowani maakowe ayeto hē nnī wasa kora Yuda maako aba, kō'du 'ba wa kaka ŋbala ga kō'du kō'du kī'dī 'ba yēni.

26 Here zē i'bēnnī zi Yowani ehe iyanni henye, “Raboni, asōsu kō'du kora mati ēdī yī aba dakapa humirē 'ba Ranga Yeredene, mo mati ēdī kō'du mo kiya? Here mo ēdī bapatisi kī'dī yaanya aba, ehe vidī biya ēdī ti'bēnnī zi mo.”

27 Yowani aya'ba do mo iya henye, “Vidī maako o'bo dē zi tēdī wa maako aba nje ezē Wiri ra i'dī zi mo.

28 E ra na vo kiya 'bama mati miya henye, 'Manza dē Korisitō ra, mora utu ma dagba komo mo.’

29 'Biyēsī ra mati mbara ne na 'bomo, mora aboka 'ba vo 'biyēsī mati o'ro dakapa mbili nī koze, ēdī na rakyenyi mati mo owo gu 'biyēsī. Nenyē ēdī hala rakyenyi 'bama o'do ku ti'de.

30 Mo atayi ndra kyedre, mora ma tayi tisiwa aba.”

Mo ma ayi ta komoriyë

31 “Mo ma ayi ta komoriyë ëdī kyedre ta da wa biya. Mo mati 'ba dakaŋo, mo zi dakaŋo ehe ame'do kö'du wa 'ba dakaŋo. Mora mo ma ayi ta komoriyë ëdī kyedre ta da wa biya.

32 Mo ayada wa ma mo ongo ehe owo, du vidi maako oma dë mī kö'du kise 'bomo ne.

33 Mora vidi mati oma mī kö'du kise 'bomo nenyë ayada henye Wirī ëdī tinyö.

34 Mo ma Wirī utu ame'do me'do 'ba Wirī ga kö'du Wirī i'dī zi mo Lawo ndo 'bëni ku.

35 'Bu owo Wisi 'bëni ehe i'dī kyigo 'ba wa biya zi mo.

36 Vidi ma oma mī Wisi ne, ëdī didi ŋburu aba, vidi ma oro Wisi ne dë atanza dë didi ŋburu aba, mora akalima hu wayaza 'ba Wirī.”

4

Yësu mbara Samariya aba

1 Farasiye owonnī henye, Yësu ëdī ku laga dagba ehe bapatisi kī'dī zi vo lö'böwë ndra ta da Yowani.

2 Tinyö Yësu abapatisi vidi kölö maako dë, nje vo lö'bö 'bomowe ra o'donnī.

3 Mati Yësu owo kö'du mati ëdī akiya ne, mo ila Yudiya ehe i'bë hulëhu zi Galilaya.

4 Ta da gëri 'bomo ani, mo omba zi ti'bë kpuru ta Samariya.

5 Mī Samariya mo ayi zi gawo maako ru mo Seka, anza dë na kowo ta ra yaka mati Yakoba i'dī zi wisi 'bëni Yosepa.

⁶ Ku'ju 'ba Yakoba ëdī ani, ehe Yësu na riti ta bi lasi, alima akaŋo dakapa ku'ju ne. Ëdī kaa kadra kutë here.

⁷ Mbara vīdī 'ba Samariya maako ayi zi wini kuwu, ehe Yësu iya zi mo henye, “İ'dī wini kuwë zi ma.”

⁸ Vo lö'bö 'bomowe i'bënnī ku mī gawo zi wakonyo kogo.

⁹ Mbara ne aya'ba dɔ mo henye, “Yi Yuda ra ehe ma vīdī 'ba Samariya ra, hala atɔ'bo ko'jo ha ma kö'du wini kuwë?” Yude uwënnī wini dë tēmī siko kölö vīdī 'ba Samariya ëtī.

¹⁰ Yësu aya'ba dɔ mo henye, “Ëzë ayɔɔ nje wa ma Wiri i'dī, ehe ëyi ra ëdī hë yi ko'jo kö'du wini kuwë, ako'jo hɔ mo, ehe mo aki'dī zi yi wini mati i'dī didī.”

¹¹ Mbara ne iya henye, “Kyedre, anza kpa dë kyere wini aba, ehe ku'ju ne ëdī na yöndu. Ta kila aki'ja wini mati i'dī didī?”

¹² Zutu 'beze Yakoba ra ole ku'ju nenye zi ze, mo gisi 'bëniyë ëtī ehe ngötu 'bomowe uwënnī biya tēmī mo. Yi kyedre ta da Yakoba?”

¹³ Yësu aya'ba dɔ mo iya henye, “Vīdī biya ma uwë wini nenye atëdī na ködrɔ löhu,

¹⁴ mora vīdī ma uwë wini mati ma ki'dī zi mo atanza dë na ködrɔ löhu. Wini mati ma ki'dī zi mo atayi mī mo na ku'ju mati aki'dī zi mo didī ma ŋburu.”

¹⁵ Mbara ne aya'ba dɔ mo iya henye, “Kyedre, i'dī zi ma wini nani! Here ma tanza dë na ködrɔ löhu, mandere kazi ma tayi kinye zi wini kuwu.”

¹⁶ Yësu ayada zi mo iya henye, “İ'bë ako'jo kora 'bëyi ehe ayi löhu.”

17 Mo aya'ba do mo iya henye, “Manza dë kora aba.” Yësu aya'ba henye, “Kö'du 'bëyi ne tñyö mati iya henye anza dë kora aba ne.

18 Oze yi ku zi kora muyi, ehe kora ma edi lima mo aba yaanya aba ne anza tñyö kora 'bëyi ra dë. Ayada zi ma kö'du tñyö ra.”

19 Mbara ne iya henye, “Kyedre, mongo yi nëbi ra.

20 Zutu 'ba Samariya amötunni Wirī da doku nenyē, mora e Yude iye henye, Yerusalema ra bi ma da kamötu zi Wirī.”

21 Yësu iya zi mo henye, “Oma mi ma, mbara, kadra mo edi atayi mati vidi amötunni 'Bu dekpe da doku nenyē mandere mi Yerusalema.

22 E Samariye ayole dë tñyö eyi ra edi ye amötu, mora ze Yude, da yolo ku eyi ra dedī mötu, ga kö'du edi kazi Yude ra vo wayomo ayi.

23 Mora kadra mo edi tayi, ehe edi ku nzo kinye, mati kyigo Lawo 'ba Wirī aba vidi akamötunni 'Bu kaa mo tñyö edi, ki'di zi mo mötu ma tñyö mati mo omba.

24 Wirī edi Lawo ra, ehe nje kyigo 'ba Lawo 'bomo aba vidi ato'bo mötu mo kaa mo tñyö edi.”

25 Mbara ne iya zi mo henye, “Ma yolo ku Masiya ne atayi, ehe ezë mo ayi, mo akayada zi ze wa biya.”

26 Yësu aya'ba henye, “Ma ra mo, ma ra mo mati edi ame'do yi aba yaanya.”

27 Mi kadra nani vo lö'bö 'ba Yësu a'banni, ehe zë na rakaga zi ki'ja mo edinni ame'do mbara aba. Mora vidi maako temi zë ako'jo ha mbara

ne dë, “A'di ra omba?” Zë ako'jonnî ha Yësu dë, “Kö'du a'di ëdiyë ame'do mbara ne aba?”

²⁸ Mbara ne ila tele wini 'bëni ne i'bë hulëhu mî gawo, ehe iya zi vidiyë ani henye,

²⁹ “Ayi onge kora ne, mo ayada zi ma biya wa mati mo'do! Mo atëdi Korisito ra?”

³⁰ Zë ilanni gawo ehe i'bënnî zi kongö Yësu.

³¹ Mî kadra ne vo lö'böwë alenzenni Yësu iyanni zi mo henye, “Raboni, oba wa maako zi konyo!”

³² Mora mo aya'ba henye, “Mëdi wakonyo maako aba ayole kö'du mo dë.”

³³ Here vo lö'böwë ayetonni, kö'du ko'jo tëmî kutë nni na bi dë nni, “Vidi maako ika wakonyo ku zi mo?”

³⁴ Yësu iya zi zë henye, “Wakonyo 'bama ëdi zi koro kö'du 'ba Wirî mati utu ma ehe zi kinde loo mati mo i'di zi ma zi ko'do.

³⁵ Akiye henye, ‘ëdi gba yehe sowo zi wakumu ta yaka.’ Mora ma yada zi ye henye, ongo bi te na laka da yake, wa mî yaka yaanya aba ahi ku, ehe ku nzo zi kumu.

³⁶ Vidi mati umu ehe atoto do mo ika ku zi didi ma nburu nburu, ehe agamo mati ili ehe mo mati umu aba, atëdinni na rakyenyi bi kölö.

³⁷ Kö'du kiya ne ëdi tinyö, ‘Maako iyî, agamo umu.’

³⁸ Mutu wë zi nyenyo kumu mî yaka mati o'do loo mo dë. Vidi maakowe o'donni loo ani, ehe i'je wa kyö tëmî loo 'bëzë ne.”

³⁹ Vidi kayo 'ba Samariya mî gawo nani omanni mî Yësu ga kö'du mbara ne iya henye, “Mo ayada zi ma biya wa ma mo'do.”

⁴⁰ Here mati vidī 'ba Samariye ayinnī zi mo, zē alenzennī mo zi lima nnī aba, ehe Yēsu alima ani ko'do riyō aba.

⁴¹ Vidī kayo 'ba Samariya maakowe omannī ga kō'du 'ba kō'du kise.

⁴² Zē iyanni zi mbara ne henye, “Doma ku yaanya aba, anza dē ga kō'du mati iya, mora ga kō'du ze na bi de ze dowo mo ku, ehe da yolo henye, mo ra tīnyō ēdī vo yomo 'ba damōku.”

Yēsu akō'jo Wisi 'ba vo mī turu maako

⁴³ Tapēti ko'do riyō aba ani, Yēsu ila bi nani ehe i'bē zi Galilaya.

⁴⁴ Kō'du mo na bi dē nī iya henye, nēbī owo dē mī dakaṅo 'bomo.

⁴⁵ Mati mo oko mī Galilaya, vidī karani irinnī mo kalakyedre aba, ga kō'du zē i'bēnnī mī karama 'ba laga 'ba koli mī Yerusalema ehe ongōnnī biya wa mati mo o'do.

⁴⁶ Mati Yēsu a'ba zi Kana mī Galilaya, bi mati mo opi wini na a'ji. Vo mī turu maako ēdī ani wisi 'bomo na koo mī Kaparanamo.

⁴⁷ Mati mo owo henye, Yēsu ayi ku ta Yudiya zi Galilaya mo i'bē zi mo ako'jo ho mo zi ti'bē Kaparanamo ehe zi kō'jo wisi 'bēnī, mati mo ku kara zi koli.

⁴⁸ Yēsu iya zi mo henye, “Vidī maako tēmī yē oma dē nje ezē onge kyinē 'ba kō'du korowe ehe rakage.”

⁴⁹ Kora vo mī turu ne aya'ba do mo henye, “Yere, ayi gba kazi wisi ama koli.”

⁵⁰ Yēsu iya zi mo henye, “I'bē wisi 'bēyī akadidī.”

Kora ne oma mī me'do 'ba Yēsu, ehe i'bē gbo.

⁵¹ Da gëri 'bomo liŋo vo litu 'bomowe andosi dë nnī mo aba kö'du kise aba zi mo. “Wisi 'bëyi ëdi ku zi ti'bë zi didi!”

⁵² Mo ako'jo hë zë iya henye, “Kadra vala ra mati wisi 'bëni ne na laka?” Zë aya'banni henye, “Ëdi ndi kadra kölö mataganya tapëti kadra kutë mati rakyitu ne ila mo.”

⁵³ Here 'bu mo asösu ëdi mi kadra kölö nani mati Yësu ayada zi ni, “Wisi 'bëyi akadidi.” Here mo ehe biya vo dakota 'bëni ëti omani gbɔ.

⁵⁴ Nenye kyinë 'ba kö'du koro ma riyö mati Yësu o'do tapëti tayi 'bomo ta Yudiya zi Galilaya.

5

Wako'jo mi kara

¹ Tapëti ma nenye, Yësu i'bë mi Yerusalema, kö'du karama yëni 'ba Yude.

² Kara Haresi kyedre 'ba timëlë mi Yerusalema, kara maako ëdi ani sënjë aba muyi, mi ha 'ba Hibiru ako'jo Betesata.

³⁻⁴ Vidi kayo 'ba rakɔɔ ëdinni ko'do ha kara ne, vo komoköndu, vo ka'bo, ehe vidi vo keŋe.

⁵ Dakapa kara ne kora maako ëdi na rakɔɔ, kɔɔ 'butëwota dömomodömowota aba.

⁶ Mati Yësu ongo kora ne ehe ayɔɔ henye mo ëdi ku na keŋe kyere kadra konda aba, mo ako'jo ho mo henye, “Omba zi yi kɔ'jo?”

⁷ Kora ne aya'ba do mo iya henye, “Kyedre, manza dë vidi maako aba zi ki'di ma mi kara ne, ezë wini ne ëdi rë ni koho riyë. Ma yonzɔ zi tödu mi mo, mora vidi maako kpa 'duwi atödu ani dagba.”

8 Yësu ayada zi mo henye, “Ënyï riyë, oba agburuku 'bëyi ehe alasi!”

9 Kandi ako'jɔ kora ne gbɔ. Mo oba agburuku 'bëni riyë ehe ayeto lasi toko. Ko'do mati kö'du ne o'dɔ rë ni mi mo ne kadra 'ba ko'do madɔmoriyö.

10 Mati vo dagbe 'ba Yude ongɔnni kora ne ëdi agburuku 'bëni kinjë, zë iyanni zi mo henye, “Nenye ko'do 'ba ralawo ra! Omba dë zi vidi maako zi kinjë agburuku mi ko'do 'ba ralawo.”

11 Mora mo aya'ba dɔ mo iya henye, “Kora mati ako'jɔ ma ne ayada zi ma kinjë riyë agburuku 'bama ehe lasi.”

12 Zë ako'jonnï hɔ mo iyanni henye, “Ëyi ra kora nenye mati ayada zi yi, zi kinjë riyë agburuku 'bëyi ehe lasi?”

13 Mora mo ayɔɔ dë, ga kö'du Yësu i'bë wëni 'de liwo ga kö'du vidi kayo.

14 Yaa Yësu i'ja kora ne mi yëkëlu ehe ayada zi mo, “Ongɔ te, yaanya aba rë yi ëdi ku na laka, mora o'dɔ kö'du kyënyë dekpe mandere kö'du kyënyë maako ndra ako'dɔ rë ni zi yi.”

15 Kora ne i'bë ayada zi vo dagbe 'ba Yude henye, Yësu ra ako'jɔ ni.

16 Zë ayetonnï kö'du kyënyë maako ko'dɔ zi Yësu ga kö'du mo o'dɔ wa kaa ma here ne mi ko'do 'ba ralawo.

17 Mora Yësu iya henye, “'Bu ma ɔɔ dë ta bi lɔ ko'dɔ, ehe nenye ra hala mëdi nduwë ko'dɔ.”

18 Yaanya aba vo dagbe 'ba Yude ombanni zi Yësu kofɔ ga kö'du riyö. Ma dagba, mo owe kö'du ki'di 'ba mi ko'do 'ba ralawo. Mora ma

kyënyë ndra, mo iya henye Wirī 'Bu nī ra, mati o'do nī kpiliri Wirī aba.

Kalakonda 'ba Wisi

¹⁹ Yësu ayada zi vidiyë iya henye, “Ma yada tinyö zi ye, Wisi o'do wa maako dë na bi dë nī. Mo ato'bo nje ko'do wa ma mo ongo 'Bu ëdī ko'do ga kö'du mo o'do kpa te wa ma mo ongo 'Bu o'do.

²⁰ 'Bu owo Wisi ehe ayada zi mo biya wa ma mo o'do. 'Bu akayada zi mo wa kyedre maako ndra ta da ma nenyë, ehe atëdiyë na rakaga.

²¹ Kaa 'Bu injë yöku ehe i'di didi, here Wisi i'di didi zi vidi mati mo omba.

²² 'Bu o'do vurë 'ba vidi maako dë, mora mo o'do Wisi 'bëni ra na vo vurë 'ba vidi ko'do biya.

²³ 'Bu o'do nenyë ga kö'du vidi biya zi Wisi koro kpa kaa zë oronni nī. Ezë vidi maako omba dë zi Wisi koro, nenyë kpa te kaa mo omba dë zi koro 'Bu mati utu mo.”

²⁴ “Ma yada tinyö zi ye henye, vidi ma owo kö'du kise 'bama ehe ëdī koma aba mi mo mati utu ma ëdī lawo didi ma nburu nburu aba, ehe o'do vurë kyënyë dë ro mo. Zë i'bënni ku nzo tēmi koli zi didi.

²⁵ Ma yada tinyö zi ye henye, kadra ne atayi ehe ëdī ku nzo kinye mati yöku biya akowo gu 'ba Wisi 'ba Wirī, ehe zë mati owonni ho mo, akalimanni.

²⁶ 'Bu ëdī kyigo aba zi didi ki'di, ehe mo i'di kyigo kölö nani zi Wisi.

²⁷ Ehe mo i'di zi Wisi 'bëni dangölö zi vurë 'ba vidi ko'do biya, ga kö'du mo Wisi 'ba Vidi.

²⁸ Re maga dë! Kadra mo atoko mati biya yöku akowo gu 'ba Wisi 'ba vidi,

29 ehe zë atayinnî yaga tēmî dawogo 'bënnî. Vidî biya ma o'donnî kö'du laka atënyinnî na didî, mora vidî biya ma o'donnî kö'du kyënyë atënyinnî na didî ehe ako'do vurë kyënyë 'bëzë."

30 "Mo'bo dë wa maako ko'do na bi da ma. 'Bu ra utu ma, ehe mo ra ayada zi ma hala zi vurë ko'do. Mo'do vurë 'bama na laka, ga kö'du moro mo, ehe mo'do dë wa mati momba zi ma ko'do."

Vo kiya 'ba Yësu

31 "Ëzë ma me'do ga kö'du ma, gëri maako anza dë ani zi yada mëdî kö'du tînyö ra yada.

32 Mora vidî maako ëdî kpa ame'do kö'du ma, ehe ma yolo wa mati mo iya ëdî tînyö.

33 Utuwë vo lituwë zi Yowani, ehe mo ayada zi zë kö'du tînyö.

34 Ma lima dë ra kö'du mati vidî iyannî kö'du ma, mora ma yada wa nenye zi ye here, zi ye yomo.

35 Yowani, lamba mati i'dî bikanyi kyö, ehe, e na rakyenyi zi lima mi bikanyi 'bomo ne tisiwa.

36 Mora vidî maako ndra ta da Yowani ame'do kö'du ma. Mo'do ne wa mati 'Bu ma i'dî zi ma ko'do. Wa biya mati mo'do ayada henye 'Bu ra utu ma.

37 'Bu mati utu ma, ame'do kpa kö'du ma, mora owowe gu mo dë mandere kongö mo da komo da komo.

38 Ome kö'du kise omo dë, ga kö'du ombe dë zi tedi koma aba mi mati mo utu.

39 Ome wayöruwë, ga kö'du asösuwë henye, aki'je didi nburu nburu mi zë. Wayöruwë ayada kö'du ma,

40 mora ombe dē zi tayi zi ma kö'du didi ma ṅburu ṅburu.”

41 “Momba kö'du wayeto 'ba vidi köndu dē,

42 mora ma yolo e, vidi ma kölo temi ye, zi Wiri towo anza dē kalakyedre aba.

43 Mayi ku kalakonda 'ba 'Bu ma aba, ehe iriyē ma dē. Mora akiriyē vidi ma ayinni na bi dē nni.

44 Hala akome? Ombe zi wayeto kiri kazi oka ma kölo maako, mora ayonze dē zi tēdi wayeto aba kazi Wiri mati ēdi kölo ne, hala ato'be koma mi ma?

45 Asösuwē dē henye, ma ra vidi ma akasusu wē zi 'Bu. İ'diyē kö'du sösu 'be ra Mosa, le mo ra vidi ma akasusu wē.

46 Mosa ayöru wa kö'du ma, ehe ezē ome mi Mosa, akome mi ma.

47 Mora ezē ome dē mi wa mati Mosa ayöru, hala ato'be koma mi wa mati miya?”

6

*Yēsu i'di wakonyo zi vidi kpulukumuyi
(Mt. 14:13-21; Mk 6:30-44; Lk 9:10-17)*

1 Tapēti ma nenyē Yēsu umu kyēti Föfö 'ba Galilaya, mati ayolo kpa na Föfö 'ba Tiberiyasi.

2 Vidi kayo usunni go mo ga kö'du ongōnni mo ēdi kyinē 'ba kö'du korowe ko'do zi ko'jo vo kōe.

3-4 Kara zi kadra karama 'ba laga 'ba koli 'ba Yude, Yēsu i'bē riyē da dōku vo lö'bō 'beniyē eti ehe alima akaṅo.

5 Mati Yēsu ongo vidi kayo tayinni zi ni, mo ako'jo ha Pilipo iya henye, “Ta kila da ki'ja ze wakonyo kyo zi to'bo vidi nenyee biya?”

⁶ Mo iya nenyè zi Pilipo yonzɔ. Mo ayɔlɔ ku nzo a'di ra mo èdì tì'bè zi ko'dɔ.

⁷ Pilipo aya'ba dɔ mo iya henye, “Ayɔlɔ dè henye, akìrì kara kòhi 'ba yehe modɔmowota nje zi kogo mangɔlɔ'bo tisi zi vidi ma kòlò nenyee?”

⁸ Anderiya, öndu 'ba Simona Petero, kòlò tèmì vo lö'böwè, mo ame'do riyè iya henye,

⁹ “Wisi maako èdì kinye, mo èdì mangɔlɔ'bo sisi aba muyi ehe kyenze riyö. Mora a'di ra na laka èdì zi vidi biya nenyee?”

¹⁰ Dakaŋo ayöfu loma aba, ehe Yèsu ayada zi vo lö'bö 'bèniyè zi yada zi vidi biya lima akaŋo. Vidi kora èdì kaa kpulukumuyi mi vidi kayo nenyee.

¹¹ Yèsu oba mangɔlɔ'bo ne mi kala ni i'di öwö'di zi Wirì. Here, mo idra mangɔlɔ'bo ne zi vidiyè, mo o'dɔ kpa here kyenze ne aba, le vidi èdinni mo aba kyɔ zi konyo.

¹² Vidi onyonni biya ma ombanni, ehe Yèsu ayada zi vo lö'bö 'bèniyè zi tɔtɔ kɔsɔ mo ma ɔsɔ, here ma yaŋa dè.

¹³ Vo lö'böwè atɔtɔnni dè zè bi kòlò ehe oso kori 'butè dɔmoriyö wa mati ɔsɔ tèmì mangɔlɔ'bo muyi ne.

¹⁴ Tapèti vidi ongonni kyinë 'ba kö'du korowe ko'dɔ 'ba Yèsu nenyè, ayeto kiyanni henye, “Nenyè atèdì tinyö Nèbì mati èdì zi tayi kinye mi damöku ne.”

¹⁵ Yèsu ayɔlɔ henye zè ombanni yonzɔ zi mo ko'dɔ na wehe zi tedi na yere 'bèzè. Here mo i'bè riyè da dòku, ani zi mo tedi kutu ni aba.

*Yèsu alasi ta da wini
(Mt 14:22-33; Mk 6:45-52)*

16 Hutaga nani aba vo lö'bö 'ba Yësu i'bënni akaŋo zi föfö.

17 Zë ëkyinni mi tönbö, ayetonni kumu kyëti zi Kaparanamo. Mati bi öndu Yësu gba ayi dë zi zë,
18 buluku kyigö ëdi ku kôho wini na kyënyë.

19 Mati vo lö'böwë opinni ku kaa wiri wota mandere sowo, zë ongönni Yësu lasi ta da wini. Mo asesi nduwë tayi kara ra tönbö, zë gbö na tere.

20 Mora mo iya henye, “Ma Yësu ra! Ere dë!”

21 Vo lö'böwë ombanni zi mo koba mi tönbö, kandi oko gbö da göti bi mati ëdinni ati'bë zi mo.

Mangolo'bo ma i'di didi

22 Ko'do vere aba vidi mati ëdinni gba ani humirë kapa 'ba föfö, ayolönni tönbö ëdi nje kölö ani. Zë ayolönni kpa henye, Yësu i'bë dë mi mo vo lö'bö 'bënyë ëti. Zë i'bënni kutu nni aba.

23 Tönbö maakowe ta Tiberiyasi i'bënni kara ta bi mati vidi kayo onyönni mangolo'bo mati Yere i'di öwö'di.

24 Zë ongönni henye Yësu ehe vo lö'bö 'bëni ëti i'bënni ku. Here zë ëkyinni mi tönböwë ehe i'bënni gbö Kaparanamo Yësu koma.

25 Zë i'janni mo kapa damirë 'ba föfö ehe ako'jonnii ho mo iyanni henye, “Raboni, oko ndala aba kinye?”

26 Yësu aya'ba do mo iya henye, “Ma yada tinyö zi ye, anze dë ma koma ga kö'du onge kyinë 'ba kö'du korowe, mora ga kö'du onyowe biya wakonyo ma ombe.

27 O'de loo dë kö'du wakonyo mati ëdi rë ni yaŋa ne. O'de loo kö'du wakonyo mati i'di didi ma nburu nburu ne. Wisi 'ba Vidi aki'di

wakonyo nenye zi ye, ga kö'du Wirī 'Bu i'di kalakonda zi mo ko'do here.”

²⁸ Vidī ako'jonnī ho mo iyannī henye, “A'di ra tīnyō Wirī omba ze zi ko'do?”

²⁹ Yēsu aya'ba do mo iya henye, “Wirī omba zi ye tēdi koma aba mī vidī mati mo utu.”

³⁰ Zē aya'bannī do mo iyannī henye, “Kyinē 'ba kö'du koro a'diye ra ako'do, here zi ze to'bo koma mī yi? A'di ra ako'do?”

³¹ Go mo yada aba, mati zutu 'bezee ēdinnī mī da lipi, Wirī i'di mana zi zē konyo. O'do rē nī kaa mati wayōruwē iyannī henye, ‘Wirī i'di mangolo'bo zi zē ta komoriyē zi konyo.’ ”

³² Yēsu ayada zi zē henye, “Ma yada tīnyō zi ye henye, Mosa ra dē vidī mati i'di mangolo'bo zi ye ta komoriyē. 'Bu ma ra i'di mangolo'bo tīnyō ne zi ye ta komoriyē.”

³³ Ehe mangolo'bo mati Wirī i'di ne ēdi vidī mati ayi akaṇo ta komoriyē zi didi ki'di zi damōku.”

³⁴ Vidī iyannī henye, “Kyedre, i'di zi ze mangolo'bo mati oṛo dē nenye.”

³⁵ Yēsu aya'ba do mo zi zē iya henye, “Ma ra mangolo'bo ma i'di didi. Vidī ma ayi zi ma, atanza dē na o'bo. Vidī ma ēdi koma aba mī ma atanza dē na kodro.”

³⁶ Ma yada ku nzo zi ye henye, onge ma mora gba anze dē koma aba mī ma.

³⁷ Vidī biya mati 'Bu i'di zi ma atayi zi ma. More ma kōlō maako tēmī zē dē.

³⁸ Mayi dē ta komoriyē zi ko'do wa mati momba. Mayi zi ko'do wa mati 'Bu omba ma zi ko'do. Mo utu ma,

³⁹ ehe mo omba zi ko'do tinyö ma kölö tēmi zē mati mo i'di zi ma ne ölu dē. Mo omba ma zi kinjē zē zi didi mi ndundu 'ba ko'do aba.

⁴⁰ 'Bu ma omba vidi biya mati ongōnni Wisi, zi tēdi koma aba mi mo, ehe zi tēdi didi ma nburu aba. Here ma kinjē zē zi didi mi ndundu ko'do aba."

⁴¹ Vidi ayetonni hē nni wasa ga kö'du Yēsu iya henye, ni ra mangolo'bo mati ayi akaŋo ta komoriyē.

⁴² Zē ako'jonnī ha oka ma kölö maako iyanni henye, "Mo anza Yēsu ra dē, wisi 'ba Yosepa? Da yolo ze 'bu mo dē ma mo aba? Hala mo ato'bo kiya henye, nayi akaŋo ta komoriyē?"

⁴³ Yēsu ayada zi zē iya henye, "Ore ta bi me'do 'be ne!

⁴⁴ Vidi maako o'bo dē tayi zi ma, nje 'Bu mati utu ma ne o'do zē komba zi tayi. Mora ezē zē ayinni, ma kinjē zē na didi mi ndundu 'ba ko'do aba.

⁴⁵ Kölö tēmi Nēbiyē ayöru henye, 'Wiri akayandi zē biya.' Here vidi biya ma owonni da 'Bu ehe ayandi kazi mo atayi zi ma.

⁴⁶ Nje vidi kölö mati ongo 'Bu ne mo ra ayi kazi Wiri. Vidi maako gba ongo 'Bu dē.

⁴⁷ Ma yada zi ye tinyö vidi biya mati edinni koma aba mi mo, edinni didi nburu aba.

⁴⁸ Ma mangolo'bo ma i'di didi!

⁴⁹ Zutu 'be onyonni mana mi da lipi ehe yaa, zē olinni.

⁵⁰ Mora kinye mangolo'bo 'ba komoriyē ne ayi ku akaŋo, here vidi mati mo onyo ku oli dē.

51 Ma ra mangolo'bo didi mati ayi akaŋo ta komoriye. Eze vidi mati onyo mangolo'bo nenyé, mo akalima nburu. Mangolo'bo mati ma ki'di zi mo ida ra ma ra, medi ki'di zi vidi 'ba damoku nenyé zi tedinni na didi."

52 Ze ayetonnii he nni wasa oka ma kolö maako aba, ehe ako'jonnii kö'du iyannii henye, "Hala mo ato'bo ki'di ida re ni zi ze konyo?"

53 Yesu aya'ba do mo iya henye, "Ma yada zi ye tinyö, alime de, nje eze onyowe ida ehe uwëe yama 'ba Wisi 'ba Vidi.

54 Mora eze onyowe ida ma ehe uwëe yama ma, atediyë didi ma nburu aba, ehe ma kinjée na didi mi ndundu 'ba ko'do aba.

55 Ida ma wakonyo ma tinyö ra, ehe yama ma wakuwe ma tinyö ra.

56 Eze onyowe ida ma ehe uwëe yama ma, e kolö ma aba ehe ma kolö eti.

57 Kaa 'Bu widi ra utu ma, ehe medi didi aba ga kö'du 'bomo, vidi biya mati onyonnii ida ma akalimanni ga kö'du 'bama.

58 Mangolo'bo mati ayi akaŋo ta komoriye anza de kaa wa mati zutu 'be onyonnii. Ze olinnii, mora vidi mati onyo mangolo'bo nenyé akalima nburu."

59 Yesu edi kö'du yeti mi bi 'ba motu mi Kaparanamo mati mo iya kö'du nenyee.

Me'do 'ba didi nburu

60 Vo lö'bö kayo 'ba Yesu owonnii mo ehe iyannii henye, "Kö'du yandi nenyé edi ndra na kyigo zi vidi maako yolo. Eyi ra ato'bo yolo mo?"

61 Yësu ayɔlo henye, vo lö'bö 'bëniyë ëdinni ame'do na wayawaya. Here mo ako'jo iya henye, “Nenye o'de na riti?”

62 A'di ra ëzë onge Wisi 'ba Vidi ëdi ti'bë riye komoriyë bi mati mo ayi ta 'domo?

63 Lawo mo ra i'di didi. Kyigɔ 'ba vidi köndu o'do waako dë. Me'do mati ma me'do zi ye ne, ëdi tëmi Lawo 'ba Wiri ma i'di didi.

64 Mora kya e maakowe ombanni dë zi tëdi koma aba mi ma.” Yësu iya nenye, ga kö'du tëmi biyeto aba mo ayɔlo ëyi ra atëdi koma aba mi ni. Mo ayɔlo kpa ëyi ra akasusu ni.

65 Yësu iya henye, “Kö'du nenye ra ma yada zi ye ɔ'be dë tayi zi ma, nje ëzë 'Bu ra o'de komba zi tayi.”

66 Ga kö'du wa mati Yësu iya, vo lö'bö kayo 'bomowe opi gë nni zi mo ehe ɔrɔnni ta bi lö'bö ga ndi mo.

67 Yësu ako'jo ha vo lö'bö 'bëni 'butë domoriyö, “E kpa ombe zi kila ma?”

68 Simona Petero aya'ba do mo iya henye, “Yere, vidi maako anza dë ani zi ze tɔ'bo ti'bë zi mo. Me'do 'bëyi i'di didi nburu.

69 Yaanya aba dëdi koma aba mi yi, ehe da yolo ku yi ra Wisi Kölö Nbala 'ba Wiri.”

70 Yësu ayada zi vo lö'bö 'bëniyë henye, “Ma jeli ye 'butë domoriyö, mora ma kölö tëmi ye dakyiky.”

71 Yësu ëdi me'do kö'du 'ba Yudasi wisi 'ba Simona Sikereto. Mo yaa akasusu Yësu mo le kölö tëmi vo lö'bö 'butë domoriyö.

7

Yësu öndu ni ëti

¹ Tapëti ma nenyë, Yësu ënyï tî'bë lasi aba mi Galilaya, mo omba dë tî'bë mi Yudiya, ga kö'du Yude ani ombannï zi kofo mo.

² Ku kara zi kadra 'ba karama 'ba mbörögö,

³ ehe önduwë 'ba Yësu iyannï zi mo henye, “Kö'du a'di i'bë dë zi Yudiya? Here vo lö'bö 'bëyiyë atɔ'bɔnni kongɔ wa mati ëdi ako'dɔ.

⁴ Vidi maako o'dɔ waako dë na liwo, ëzë zë ombannï zi maakowe zi yɔlɔ kö'du zë. Here i'di damöku ma yɔlɔ wa ma ëdi ako'dɔ.”

⁵ Gbi le önduwë 'ba Yësu gba ayinnï dë na vo lö'bö 'bɔmo.

⁶ Yësu aya'ba iya henye, “Kadra 'bama gba ayi dë, mora kadra 'be ëdi 'duwi kinye.

⁷ Vidi 'ba damöku nenyë ɔ'bɔnni dë e kiyi. Zë iyinnï ma, ga kö'du ma yada nduwë zi zë henye, zë o'dɔnni kö'du kyënyë.

⁸ I'bëë dagba mi karama. Kadra 'bama gba ɔkɔ dë, ehe mi'bë dë.”

⁹ Yësu iya nenyë ehe alima zɔ mi Galilaya.

Yësu mi karama 'ba mbörögö

¹⁰ Tapëti öndu 'ba Yësu i'bënni ku mi karama, mo i'bë liwo kazi yada zi vidi maako.

¹¹ Mi kadra 'ba karama aba, vo dagbe 'ba Yude omannï Yësu ehe ako'jonnï kö'du henye, “Mo ëdi kila?”

¹² Vidi kayo alëpinnï mi ha wasa kö'du mo. Maakowe iyannï henye, “Yësu kora laka ra,” agamowe iyannï henye, “Mo ëdi ndɔndɔ kiga zi vidi biya.”

13 Mora vidiyë na tere kazi vo dagba 'bëzë, ehe vidì maako ame'do dë ta da komo vidì kayo kö'du mo.

14 Mati karama ku kutë zi rë nì kinde, Yësu i'bë mī yëkëlu ayeto wayandi.

15 Vo dagbe na rakaga ehe iyanni henye, “Hala kora nenye ayɔɔ kö'du takanyi here? Ayandi mo kpa dë.”

16 Yësu aya'ba dɔ mo iya henye, “Manza dë yandi wa mati ma sösü kö'du mo. Wa mati mëdì ayandi ayi kazi vidì ma utu ma.

17 Èzë tinyö ombe zi koro Wiri, akayɔle wa mati ma yandi ayi kazi Wiri mandere kazi ma.

18 Èzë momba zi kika wakoro zi ma, ma kame'do kö'du ma. Mora momba zi koro vidì ma utu ma. Nenyë ra ma yada kö'du tinyö anza dë ndɔndɔ.

19 Mosa ra dë i'dì kö'du kī'dì zi ye? Vidì maako tëmì yë oro dë. Here kö'du a'di ombe zi ma kofo?”

20 Vidì kayo aya'bannì dɔ mo iyanni henye, “Yi vo dakyikyì! A'di ra o'dɔ yì zi kö'du sösü henye, vidì maako omba zi kofo yì?”

21 Yësu aya'ba dɔ mo iya henye, “Mo'dɔ kö'du koro kölö ehe o'de na rakaga.

22 Mosa i'dì kö'du zi ye zi gisi kora 'be n̄bete. Mora tinyö anza Mosa ra dë i'dì kö'du kī'dì nenye zi ye. Zutu 'be ra. Mī ko'do 'ba ralawo aba aṅbeteë gisi kora 'be

23 zi kö'du kī'dì 'ba Mosa koro. Èzë wisi maako atɔ'bo n̄bete mī ko'do 'ba ralawo, kö'du a'di ra e na kamo ma aba ga kö'du vidì maako ko'dɔ na laka mī ko'do 'ba ralawo?

24 O'de vure dē dakyinē 'ba ra laya aba. O'de wa mati tinyō ra aba.”

Mo Korisitɔ ra?

25 Kya vidī maakowe ta Yerusalema ēdī kiyannī henye, “Anza dē kora nenye ra zē ombannī zi kofɔ?”

26 Here mo ēdī gba zɔ kinye, me'do zi vidī biya kowonnī. Ehe vidī maako awasa hē nnī dē mo aba. Here ne kō'du sōsu 'be aba vo dagbe ayɔlɔnnī ku tinyō mo ra Korisitɔ?

27 Mora nani akatɔ'bo tēdī hala? Vidī maako ayɔlɔ dē bi mati Korisitɔ ne atayi ta 'dɔmo, mora da yɔlɔ ze bi mati kora nenye ayi ta 'dɔmo.”

28 Mati Yēsu ēdī kō'du yandi mī yēkēlu, mo agbōgbō hē nī iya henye, “Tinyō asōsuwē ayɔle ma ku, ehe ta kila mayi ta 'dɔmo? Mayi dē na bi da ma! Vidī mati utu ma ēdī tinyō, ehe ayɔle mo dē.

29 Mora ma yɔlɔ vidī mati utu ma, ga kō'du mayi kazi mo.”

30 Kya vidī maakowe ombannī zi Yēsu kīrī, mora du vidī maako i'dī kala nī dē dɔ mo, ga kō'du kadra 'bomo gba ɔkɔ dē.

31 Mora vidī kayo mī kutē vidī nee i'dinnī koma 'bēnnī mī mo ehe iyannī henye, “Ēzē Korisitɔ ne ayi, mo ako'do kyinē 'ba kō'du korowe ndra ta da kora nenye?”

Utu vo kanye 'ba yēkēlu zi Yēsu kīrī

32 Mati Farasiye owonnī vidī kayo ēdinnī hē nnī wasa ga kō'du 'ba Yēsu, zē ehe kyedree 'ba vo karase utunnī vo kanye 'ba yēkēlu zi mo kīrī.

³³ Mora Yēsu ayada zi zē iya henye, “Ma tēdī ētī tisi na konda, ehe ma ta'ba zi vīdī mati utu ma ne.

³⁴ Akome ma, mora du aki'je ma dē. Ɔ'be dē tī'bē bi mati mēdī tī'bē 'dōmo.”

³⁵ Vīdī ako'jonnī ha oka ma kōlō maako henye, “Kila mo atɔ'bo tī'bē zi sesi ze ta bi nī ki'ja? Mo ēdī tī'bē mī dakaŋo mēnzē maakowe mati vīdī 'bezee ēdinnī alima? Mo ēdī tī'bē ani zi vīdīyē 'ba Gīrīgī yandi?

³⁶ A'di ra mī me'do 'bomo mati mo iya henye, da koma ze nī mora di'ja nī dē? Kō'du a'di da tɔ'bo dē tī'bē bi mati mo ēdī tī'bē?”

Lili 'ba wini ma i'di didi

³⁷ Mī ndundu mo ehe mī ko'do kyedre 'ba karama, Yēsu ɔɔ riyē ehe agbōgbō hē nī iya henye, “Ēzē ēdīyē kɔdrɔ aba, ayiye zi ma ehe uwēè!

³⁸ Ēdīyē koma aba mī ma, atēdīyē wini ma i'di didi, taho tēmī yōndu 'ba mī yē, kaa wayōruwē iyannī henye.”

³⁹ Yēsu ēdī ame'do kō'du 'ba Lawo Laka, mati aki'di zi vīdī biya mati ēdinnī koma aba mī mo. Lawo ne gba i'di dē zi vīdī kōlō maako, kyere Yēsu gba i'di bikanyi kyedre 'bēnī dē ndo.

Rakinye mī kutē vīdī

⁴⁰ Mati vīdī kayo owonnī Yēsu iyannī nenye, kya maakowe iyannī henye, “Mo atēdī Nēbī ra.”

⁴¹ Agamowe iyannī henye, “Mo Korisito ra.” Agamowe iyannī kpa henye, “Korisito ne atɔ'bo tayi ta Galilaya?

⁴² Wayōruwē iyannī henye, Korisito atayi tēmī dakota 'ba Yere Dawidi. Here kō'du nenye gɔ mo

ya'ba aba, ako'jo mo mi Beteleme, mi gawo mati Dawidi alima 'domo?"

⁴³ Vidi ayetonni me'do ra oka ma kolö maako ga kö'du 'ba Yësu.

⁴⁴ Kya zë maakowe ombanni zi mo kiri, mora du vidi maako i'di kala ni de do mo.

Vo dagbe ombanni de zi tedi koma aba mi Yësu

⁴⁵ Mati vo kanye 'ba yekelu a'banni zi kyedree 'ba vo karase ehe Farasiye, ako'jo he zë henye, "Kö'du a'di ike Yësu de kinye?"

⁴⁶ Zë aya'banni henye, "Vidi maako gba ame'do de kaa kora nenye."

⁴⁷ Farasiye iyanni zi zë henye, "Mo o'do lumë kpa ku re?"

⁴⁸ Ma kolö temi kyedree 'ba vo karase mandere Farasiye edi koma aba mi mo?

⁴⁹ Ehe vidi nenye mati ayolanni kö'du ki'di de, zë hu wasene 'ba Wiri."

⁵⁰ Nikodimö mati i'bë zi Yësu dagba, ehe mo kolö temi vo dagbe 'ba Yude, iya henye, ehe mo ra kpa kyere ayi zi Yësu kongö. Mo iya henye,

⁵¹ "Kö'du ki'di 'beze ila ze de zi riti ki'di zi vidi gba kazi ze kowo wa ma zë ombanni kiya. Do'bo de vure 'bezë ko'do gba kazi ze yolo a'di ra zë o'donni."

⁵² Zë iyanni henye, "Nikodimö, yi temi Galilaya? Ako'jo wayöru nee, ehe aki'ja henye, nebï ako anza de zi tayi ta Galilaya."

⁵³ Vidi biya i'benni gbo linjo 'benni na kutu kutu.

8

*Mbara iri ta bi ndoro ko'do**

¹ Mora Yësu i'bě yaga zi Döku 'ba Olivo.

² Damindö vere aba ɲɔɔ mo i'bě zi yëkëlu. Vidi ayinni zi mo, mo alima akaɲo ehe ayeto zë yandi.

³ Vo komoyandiye 'ba kö'du ki'di ehe Farasiye ikanni loko mbara maako iri ta bi ndoro ko'do, ehe zë o'donni mo atɔɔ komo nni biya.

⁴ Here zë iyanni henye, “Raboni, mbara nenyè iri ëdi ko'do kora maako aba anza o'di 'bomo ra dë.

⁵ Kö'du ki'di 'ba Mosa ayandi henye, mbara kaa ma nenyè zi ku'du brua yitö aba. A'di ra iya?”

⁶ Zë ako'jonnì ha Yësu, kö'du ko'jo nenyè aba, ga kö'du zë ombanni mo susu ehe zi kö'du kyënyë maako kika rɔ mo. Mora Yësu idë rë nì ayeto wayöru dakaɲo dawisi kala nì aba.

⁷ Zë asesinni zɔ nduwë hɔ mo ko'jo kö'du 'ba mbara ne. Ndundu mo aba mo ɔɔ riyë iya henye, “Ëzë vidi maako tëmì yë o'do kö'du kyënyë dë mu'du dagba yitö dɔ mo.”

⁸ Mo idë rë nì kpa löhu ayeto wayöru dakaɲo.

⁹ Vidi nee i'běnni biya na kölö kölö, ayeto ma tendro mo aba. Ndundu mo aba Yësu mbara ne aba ɔɔnni kutu nni aba.

¹⁰ Yësu ɔɔ riyë ako'jo hɔ mo iya henye, “Vidi nee biya kila? Vidi maako anza kpe zi yi susu?”

¹¹ Mbara ne aya'ba dɔ mo iya henye, “Ee Kyedre, vidi maako anza dë.” Yësu ayada zi mo iya henye, “Manza dë kpa ti'bě zi yi susu. I'bě yaanya aba, o'do kö'du kyënyë dekpe.”

* 8: Komo nenyè anza dë mi dagba wayöru 'ba Bayibolo.

Yësu bikanyi kö'du damöku

12 Kpa löhu Yësu ame'do zi vidiyë. Kadra nenyë aba mo iya henye, “Ma ra bikanyi kö'du damöku. Usu ga ma, ehe alasi dë mi biköndu. Akatëdi bikanyi ma ak'i'di didi aba.”

13 Farasiye iyanni zi mo henye, “Yi ra nje vidi ma edi ame'do kö'du yi, ehe anza dë tinyö na laka zi yi ra tedi akpa na vo kiya 'beyi.”

14 Yësu aya'ba do mo iya henye, “Here ezë ma me'do le kö'du ma, wa ma miya edi tinyö. Ma yolo ku mayi ta kila ehe medi ti'bë kila. Mora ayole dë ma ta kila mandere medi ti'bë kila.

15 O'de vure temi geri kolö mati vidi biya o'donni, mora mo'do vure 'ba vidi maako dë.

16 Ezë mo'do vure, ma ko'do na laka, ga kö'du ma ko'do dë kutu ma aba. 'Bu mati utu ma ne edi kinye ma aba.

17 Kö'du ki'di 'be omba vo kiya riyö zi yada kö'du ne edi tinyö.

18 Ma kolö temi vo kiya 'bame, ehe 'Bu mati utu ma edi agamo maako.”

19 Zë ako'jonn'i ho mo iyanni henye, “Bu yi edi kila?” Yësu aya'ba do mo iya henye, “Ayole ma dë mandere 'Bu ma. Ezë ayole ma, akayole 'Bu ma.”

20 Yësu iya nenyë mati mo edi gba kö'du yandi mi bi ma söndu 'ba waki'di 'ba yekëlu asesi 'domo. Mora vidi maako iri mo dë ga kö'du kadra 'bomo gba ayi dë.

ɔ'be dë ti'bë bi mati medi ti'bë

21 Yësu ayada kpa zi vo dagbe 'ba yen'i henye, “Medi ti'bë 'de akome ma, mora ɔ'be dë ti'bë bi

mati mēdi atī'bē, akoliye kō'du kyēnyē 'be kazi wakila."

²² Vīdī ako'jonnī kō'du iyannī henye, "Mo omba zi rē nī kofo? Ēdī nani wa ma mo iya henye, dɔ'bɔ dē tī'bē bi mati mo ēdī tī'bē?"

²³ Yēsu aya'ba dɔ mo iya henye, "Ēdiyē ta lebi, mora ma ta riyē. E 'ba damōku nenyē, mora manza dē 'ba damōku nenyē.

²⁴ Kō'du nenyē ra miya akoliye kō'du kyēnyē 'be aba. Ēzē anze dē koma aba mā ma, kō'du ēyī mēdi, akoliye mā kō'du kyēnyē 'be ila dē."

²⁵ Zē ako'jonnī ha Yēsu iyannī henye, "Yī 'bēyī ēyī?" Yēsu aya'ba dɔ mo iya henye, "Ma ra te mati ma yada zi ye biyeto aba.

²⁶ Ani kō'du ēdī kyɔ ma tɔ'bɔ kiya zi yada henye o'de kō'du kyēnyē, mora vīdī mati utu ma ēdī tīnyō, ehe ma yada zi vīdī 'ba damōku nenyē nje wa mati mowo kazi mo."

²⁷ Vīdī maako ayɔɔ dē Yēsu ēdī amē'do zi zē kō'du 'Bu nī.

²⁸ Yēsu ī'bē nduwē kiya mo aba henye, "Ēzē umbēē Wisi 'ba Vīdī ku riyē, akayɔle ēyī ra ma. Akayɔle kpa henye manza dē wa maako ko'dɔ na bi da ma. Miya nje wa mati 'Bu ma ayandi zi ma.

²⁹ Mo mati utu ma ēdī mā aba. 'Duwī mo'dɔ wa mati o'dɔ mo na rakyenyī ehe mo ila ma dē."

³⁰ Tapēti Yēsu iya nenyē, vīdī kayo omannī mā mo.

Kō'du tīnyō akinga yī na dangölö

³¹ Yēsu ayada zi vīdī mati ēdinnī koma aba mā nī henye, "Ēzē asesiye nduwē koro wa mati miya, e tīnyō vo lö'bō 'bama ra.

32 Akayole kö'du tinyö, ehe kö'du tinyö akinge na dangölö.”

33 Zë aya'bannì do mo iyannì henye, “Ze gisi 'ba Abarayama! Danza dë gba na vo kalima 'ba vidi maako. Hala ato'bo kiya akinga ze na dangölö?”

34 Yësu aya'ba do mo iya henye, “Ma yada tinyö zi ye, vidi ma o'do kö'du kyënyë ëdi vo kalima 'ba kö'du kyënyë.

35 Vo kalime, alimannì dë nburu mi dakota, ëzë wisi alese le 'duwi mi dakota.

36 Èzë Wisi i'di zi ye dangölö, tinyö aba e na dangölö.

37 Ma yolo ku, e temi dakota 'ba Abarayama, mora ombe zi ma kofo, ga kö'du, kö'du kise 'bama anza dë tinyö mi di'di ye.

38 Mëdi ame'do kö'du wa mati 'Bu ma ayada zi ma, te kaa mati ëdiyë ako'do wa mati 'bu wë ayandi zi ye.”

39 Vidi iyannì zi Yësu henye, “Abarayama ra 'bu ze!” Yësu aya'ba do mo iya henye, “Èzë e gisi 'ba Abarayama, o'de wa mati Abarayama o'do.

40 Tapëti mo ombe zi ma kofo ta bi kö'du tinyö yada zi ye mati Wirì i'di zi ma. Abarayama o'do waako dë kaa ma nani.

41 Mora ëdi ko'de te wa mati 'bu wë o'do.” Zë iyannì henye, “Asusu ze dë zi kiya dëdi kpa 'bu maako aba. Dëdi nje 'bu aba kolö, mo ra Wirì.”

42 Yësu iya zi zë henye, “Èzë Wirì ra 'Bu wë, owe ma, ga kö'du mayi kazi Wirì yaanya aba mëdi kinye. Mo ra utu ma. Mayi dë na bi da ma.

43 Kö'du a'di ra ayole kö'du mati mēdi ame'do kö'du mo dē? Ǿ'be dē tɔɔ zi kowo kö'du mati mēdi akiya?

44 'Bu wē ra Satani, ehe o'de te wa mati mo omba. Mo 'duwi vo wakofu ehe vo ndɔndɔ. Kö'du tinyō ako anza dē kö'du mo. Mo ame'do kö'du ni, ehe kö'du biya mati mo iya ndɔndɔ ra. Anza dē nje mo ra na vo ndɔndɔ, mora mo kpa 'bu 'ba vo ndɔnde biya.

45 Ga kö'du ma yada zi ye kö'du tinyō, e ombe dē zi tēdi koma aba mi ma.

46 Vidi maako tēmi yē atɔ'bo ma susu ga kö'du kyēnyē ko'do? Ēzē ma yada kö'du tinyō, kö'du a'di ra ome dē mi ma?

47 Vidi mati 'ba Wiri akoze mbili ni da kö'du kise 'bomo, mora ombe dē zi kowo, ga kö'du anze dē 'ba Wiri."

Yēsu ehe Abarayama

48 Yude aya'banni zi Yēsu henye, "Dēdi ze tinyō aba zi kiya henye, yi vidi 'ba Samariya ra, ehe ēdi dakyikyī aba mi yi?"

49 Yēsu aya'ba do mo iya henye, "Manza dē dakyikyī aba mi ma. Moro 'Bu ma, ehe ombe dē zi koro ma.

50 Momba wakoro dē ga kö'du ma, mora vidi maako ēdi ani omba zi ma tēdi na wakoro, ehe mo ra kpa 'ba vurē ko'do.

51 Ma yada tinyō zi ye henye, ēzē orowe me'do 'bama du akoliye dē."

52 Vidi iyanni henye, "Yaanya aba tinyō da yolo ku ēdi dakyikyī aba. Abarayama oli ehe nēbiyē kpa. Hala o'bo kiya henye, vidi mati oro me'do 'bēyi oli dē?

⁵³ Yi kyedre ta da 'bu ze Abarayama? Mo oli ehe nēbiyē kpa. Ēyī ra asōsu 'bēyī yī?"

⁵⁴ Yēsu aya'ba dɔ mo iya henye, "Ēzē moro ra ma, o'dɔ waako dē. 'Bu ma ra vīdī ma oro ma. Iye henye mo Wīrī 'be ra.

⁵⁵ Gbī le tīnyō ayɔle mo dē, mora ma yɔlɔ mo. Ēzē miya ma yɔlɔ mo dē, ma tēdī na vo ndɔndɔ kpa kaa e biya. Mora ma yɔlɔ mo, ehe mo'dɔ wa mati mo iya.

⁵⁶ 'Bu wē Abarayama ēdī rakyenyi aba zi kongɔ kadra tayi 'bama, mo ongo ma ehe ēdī na rakyenyi."

⁵⁷ Zē iyanni henye, "Anza kpa dē kɔɔ 'butēmuyī aba. Hala ɔ'bo kongɔ Abarayama?"

⁵⁸ Yēsu aya'ba dɔ mo iya henye, "Ma yada tīnyō zi ye, gba Abarayama anza dē, mēdī."

⁵⁹ Vīdī obanni yītō riyē zi Yēsu kofo, mora mo oho rē nī ehe ila yēkēlu.

9

Yēsu akɔ'jɔ kora maako o'jo na komokɔndu

¹ Mati Yēsu alasi na konda, mo ongo kora maako na komokɔndu kyere mati o'jo.

² Vo lō'bōwē 'ba Yēsu ako'jonnī henye, "Raboni, kō'du a'di ra kora nenye o'jo na komokɔndu? Ēdī ga kō'du mo, mandere vo ko'jo mowe o'donnī kō'du kyēnyē?"

³ Yēsu aya'ba dɔ mo iya henye, "E e, anza here dē. Mora ga kō'du komokɔndu 'bomo, akonge Wīrī ako'dɔ kō'du koro zi mo.

⁴ Ęzē ēdī kadra, do'de wa mati vīdī ma utu ma omba ma zi ko'do. Ęzē yondo oko ku, vīdī maako o'bo dē zi loo ko'do.

⁵ Mati mēdi mī damōku, ma bikanyi ra zi damōku.”

⁶ Tapētī Yēsu iya nenye, mo o'bi oro dakaŋo. Mo o'do koro ehe ora komo kora ne.

⁷ Here mo iya henye, “Ī'bē akaka koro ne mī Kara Siliyoma.” Kora ne ĩ'bē ehe akaka mī Siliyoma. Kō'du ya'ba aba, “Vīdī ma utu, akutu.” Mati mo akaka koro ne ku yaga mo o'bo bi kongō.

⁸ Vo haliŋo oka 'bomowe, ehe vīdī mati ongōnnī mo ta bi lenze kyere ne, ako'jonnī kō'du henye, “Nenye anza dē kora mati ēdī alima akaŋo ehe 'duwī alenze?”

⁹ Kya zē maakowe iyannī henye, mo ra gbī te kora vo lenze ne, agamowe iyannī henye, mo andele nje kaa mo. Mora mo ayada zi zē, “Ma kora nani ra.”

¹⁰ Zē ako'jonnī ho mo henye, “Hala o'bo bi kongō?”

¹¹ Mo aya'ba do mo iya henye, “Vīdī maako ru mo Yēsu o'do koro ehe ora komo ma. Mo ayada zi ma ti'bē kaka mī Kara Siliyoma. Mati mo'do, mo'bo bi kongō.”

¹² Zē ako'jonnī kō'du henye, “Mo ēdī kila yaanya aba?” Mo aya'ba do mo iya henye, “Ma yolo dē.”

Farasiye ayonzonnī zi ki'ja a'di ra o'do rē nī

¹³⁻¹⁴ Ko'do mati Yēsu o'do koro ne ehe ako'jo kora ne, mī ko'do 'ba ralawo. Here vīdī obannī kora ne zi Farasiye.

¹⁵ Zē ako'jonnī hō mo hala mo ɔ'bo zi bi kongɔ, ehe mo aya'ba henye, “Yēsu o'do korɔ ehe ora komo ma. Tapēti ma kaka, mo'bo bi kongɔ.”

¹⁶ Kya 'ba Farasi maakowe iyannī henye, “Kora nenye Yēsu ayi dē kazi Wirī. Ēzē mo o'do here, mo ɔ'bo dē kowe kö'du kī'dī 'ba ko'do madomoriyō.” Agamowe ako'jonnī henye, “Hala vīdī 'ba kö'du kyēnyē atɔ'bo ko'do kyinē 'ba kö'du korowe?” Here Farasiye ɔ'bonnī dē kö'du kida tēmī kutē nnī,

¹⁷ zē ako'jonnī ha kora ne iyannī henye, “A'di ra iya, kö'du vīdī mati ako'jo komo yī ne?” Kora ne ayada zi zē iya henye, “Mo nēbī ra.”

¹⁸ Mora vo dagbe 'ba Farasiye omannī dē henye, kyere kora ne ēdī na vo komoköndu. Zē utunnī litu zi vo ko'jo mowe,

¹⁹ ehe ako'jonnī hē zē henye, “Nenye wisi mati iye henye, o'jo na komoköndu? Hala mo ɔ'bo bi kongɔ yaanya aba?”

²⁰ Vo ko'jo 'ba kora ne aya'bannī do mo henye, “Da yolo ku tinyō mo wisi 'beze ra, ehe da yolo ku o'jo mo na komoköndu.

²¹ Mora da yolo dē hala mo i'ja komo nī mandere ēyī ra i'dī komo zi mo. Ako'jowe hō mo! Mo övu ku kyedre zi me'do ga kö'du nī.”

²²⁻²³ Vo ko'jo 'ba kora nenye iyannī here, ga kö'du zē erennī Yude. Vo dagbe 'ba Yude idannī kö'du ku nzo henye, vīdī maako manza dē wa maako aba zi ko'do zi vīdī maako mati mo iya Yēsu ra Korisitɔ ne.

²⁴ Vo dagbe ako'jonnī kora ne hulēhu iyannī henye, “I'dī wayeto zi Wirī! Da yolo ku Yēsu vo kö'du kyēnyē ko'do.”

25 Kora ne aya'ba henye, “Ma yolo dë, ëzë mo vo kö'du kyënyë mandere anza dë. Biya ma yolo henye, ma kyere vo komoköndu, mora yaanya aba mo'bo bi kongö.”

26 Zë ako'jonni ho mo henye, “A'di ra mo o'do zi yi? Hala mo ako'jo komo yi?”

27 Kora ne aya'ba do mo iya henye, “Ma yada ku zi ye da kölö, ehe ombe dë zi kowo. Kö'du a'di ra ombe zi ma yada zi ye löhu? Ombe kpa zi tayi na vo lö'bö 'bomowe?”

28 Vo dagbe alidinni kora ne, ehe iyanni henye, “Yi vo lö'bö 'bomo! Ze vo lö'bö 'ba Mosa.

29 Tinyö da yolo Wirri ame'do zi Mosa, mora du da yolo dë Yësu ayi ta kila.”

30 Kora ne aya'ba da me'do iya henye, “Kö'du koro a'di ra here! Mo ako'jo komo ma, ehe gba ayole dë mo ayi ta kila.

31 Da yolo ku henye, Wirri owo nje me'do 'ba vidi mati owonni ehe oronni mo. Wirri owo me'do 'ba vo kö'du kyënyë ko'de dë.

32 Ehe nenyë edi dagba kadra mi vurë, vidi maako idi komo zi vidi maako o'jo na komoköndu.

33 Yësu o'bo dë zi wa maako ko'do, nje ëzë mo ayi kazi Wirri.”

34 Vo dagbe ayadanni zi kora ne henye, “Yi na vo kö'du kyënyë ko'do kyere mi kadra mati o'jo yi. Asösu 'beyi ato'bo yandi ze wa maako aba?” Here zë iyanni henye, “O'bo dekpe tayi hulëhu mi bi 'ba mötu 'beze kölö maako!”

Komoköndu zi Lawo Laka

³⁵ Mati Yësu owo kö'du mati o'do rë ni ne, mo i'bë i'ja kora ne. Yësu ako'jo ho mo iya henye, “Èdì koma aba mi Wisi 'ba Vidi?”

³⁶ Mo aya'ba do mo iya henye, “Kyedre, ezë ayada zi ma mo eyi ra, ma ki'di koma 'bama mi mo.”

³⁷ Yësu aya'ba henye, “Ongɔ mo ku nzo, ehe yaanya aba mo edi me'do yi aba.”

³⁸ Kora ne iya henye, “Yere, mi'di koma 'bama mi yi.” Here mo amotu Yësu gbɔ.

³⁹ Yësu ayada zi mo, “Mayi mi damoku nenye, zi vurë 'ba vidiyë ko'do. Ma kinye zi ki'di komo zi vo komokönduwë ehe zi ko'do vidi vo komoköndu biya mati ato'bo bi kongɔ.”

⁴⁰ Mati Farasiye owonni Yësu iya nenye, zë ako'jonnì henye, “Ze vo komoköndu?”

⁴¹ Yësu aya'ba do mo iya henye, “Èzë ediyë na vo komoköndu, atanze dë mi kö'du kyënyë. Mora yaanya ezë aba iye zi bi kongɔ, akasesiye kö'du kyënyë nduwë.”

10

Komo 'ba vo timelë yako

¹ Yësu iya henye, “Ma yada tinyö zi ye, nje vo logo ehe vo wakolo ëkyi ta da resi. Zë ödunni dë kpuru ta haresi zi jolo 'ba timelë.

² Vidi mati ödu kpuru ta haresi, mo ra vo yako 'ba timelë.

³ Mora vo ga haresi kongɔ ayëhu haresi zi vo yako timelë, ehe timelë ayolonni gu vo yako 'benni. Mo ako'jo timelë 'beni ru zë aba, ehe alaga dagba zi zë yaga.

⁴ Mati mo ayasi timëlë 'bëni nee ku biya yaga, mo i'bë dagba da komo zë, ehe zë usunni gɔ mo, ga kö'du zë ayɔlonni gu mo.

⁵ Timëlë usu ga vo leze maakowe dë. Zë ayɔlonni gu vo leze dë, ehe zë ahonni 'de."

⁶ Yësu ayada komo nenyë zi vidiyë, mora zë ayɔlonni dë a'di ra mo ëdi ame'do kö'du mo.

Yësu vo timëlë yako laka ra

⁷ Here Yësu iya löhu, "Ma yada tinyö zi ye henye, ma haresi zi timëlë.

⁸ Vidi mati ayi dagba ta komo ma, vo logo ra mandere vo wakolo, ehe timëlë owo da ma kölö tëmï zë ne dë.

⁹ Ma haresi ra. Zë biya mati ayinni kpuru ta da ma, akayɔmo. Zë atayinni, ati'bënni, ehe aki'janni loma.

¹⁰ Vo logo ayi nje zi kolo, kofo, ehe yaɲa. Mayi zi vidi biya tédinni didi aba, ehe zi tédinni mo aba ndo.

¹¹ "Ma vo timëlë yako laka ra. Vo timëlë yako laka i'di didi ni kö'du timëlë 'bëni.

¹² Vo loo ko'do anzanni dë kaa vo timëlë yako mati timëlë na 'bomo. Èzë ongɔnni wöliwöli atayi, zë aho wënni ilanni timëlë. Here wöliwöli iri ehe apere timëlë nee.

¹³ Vo loo ko'do aho wënni 'de ga kö'du zë asösunni kö'du 'ba timëlë nee dë.

¹⁴ "Ma vo timëlë yako laka ra. Ma yolo timëlë ame, ehe zë ayɔlonni ma,

¹⁵ kpa kaa 'Bu ayolo ma, ma yolo 'Bu, ehe mi'di didi ma kö'du timëlë ama.

¹⁶ Mëdi timëlë maako ëti anzanni dë tëmï jolo 'ba timëlë nenyë. Ma kika zë kpa ga bi kölö, ehe

zë akowonnï gu ma. Here atëdinnï goli kôlô 'ba timëlë ehe vo yako kôlô.

17 “‘Bu ɔwɔ ma ga kô'du mï'dï dïdï ma, here ma kïrï hulëhu löhu.

18 Vïdï maako oba dïdï ma dë kazi ma. Ma ra mï'dï mï kô'du komba 'bama. Mëdï kyigɔ aba zi kï'dï, ehe kyigɔ aba zi kïrï hulëhu löhu, kaa mati 'Bu ma i'dï kô'du mo zi ma zi ko'do.”

19 Mati zë owonnï me'do 'ba Yësu ne, Yude inye mï nni.

20 Maakowe kyɔ tëmï zë iyannï henye, “Mo ëdï dakyikyi aba mï nï. Mo vo lökyï ra. Kô'du a'di zi mbili koze zi mo?”

21 Mora agamowe iyannï henye, “Hala vïdï mati dakyikyi aba mï nï atɔ'bo kiya kô'du nenyee? Vïdï maako anza dë kaa nenyee zi tɔ'bo vo komokönduwë kï'dï zi bi kongɔ?”

Vïdï ombannï Yësu dë

22 Mï tona nani, Yësu ëdï mï Yerusalema kô'du karama 'ba yëkëlu.

23 Kadra maako aba, mo ëdï alasi mï kapa 'ba yëkëlu sënjë 'ba Solomono

24 ehe Yude atɔtɔ rë nni toko rɔ mo. Zë iyannï henye, “Hala na konda omba tï'bë ze sesi kô'du sösü aba? Èzë yï Korisitɔ ra, ayada zi ze huwë.”

25 Yësu aya'ba do mo iya henye, “Ma yada zi ye, ehe ombe dë zi koma kô'du 'bama. Wa mati mo'do kalakonda 'ba 'Bu ma aba, ayada ëyi ra ma.

26 Mora kyere anze dë timëlë ama, ome kô'du 'bama dë.

27 Timëlë ama owonnï gu ma, ehe ma yolɔ zë. Zë usunnï ga ma.

28 Mì'di didi ma ḡburu zi zè, here kazi zè ölunnì. Vidi maako akoba zè dè yaga ta kala ma.

29 'Bu ma i'di zè zi ma, ehe mo kyedre ta da agamowe biya. Vidi maako ɔ'bo dè zè koba ta kala mo

30 Ma kòlò 'Bu aba."

31 Kpa löhu vo dagbe 'ba Yude obanni yitò kö'du zi Yèsu kofo.

32 Mora mo iya henye, "Ma yada wa laka kyɔ zi ye mati 'Bu ma utu ma zi ko'dɔ. Ma vala ra ombe ma ku'du gɔ mo yitò aba?"

33 Zè aya'banni dɔ mo iyanni henye, "Danza dè yi ku'du yitò aba ga kö'du wa laka mati o'dɔ. Dèdi yi ku'du yitò aba ga kö'du alidi Wirì. Yi öḡbö vidi ra, ehe kinye èdi akiya zi tedi na Wirì."

34 Yèsu aya'ba dɔ mo iya henye, "Mì wayöru 'be, Wirì iya dè henye, 'E wirì mbiya ra?"

35 ɔ'be dè he wasa wayöru aba, mati mi mo Wirì ame'do zi vidi naniye ehe ako'jo zè wirì.

36 Here kö'du a'di asusuwè ma lidi Wirì ga kö'du miya henye ma Wisi 'ba Wirì? Tapèti mo biya, èdi 'Bu ra ako'jo ma kö'du loɔ nenye. Mo ra kpa vidi mati utu ma mi damöku.

37 Èzè manza dè ako'dɔ wa mati 'Bu ma omba ma zi ko'dɔ, neene ome dè mi ma.

38 Mora èzè mo'dɔ wa mati 'Bu ma o'dɔ, akome ga kö'du nani, gbì le èzè anze dè koma aba mi ma. Neene akayɔle tɔnyö henye, 'Bu èdi kòlò ma aba, ehe ma kòlò 'Bu aba."

39 Löhu zè ombanni zi Yèsu kiri. Yèsu anza dè hu kyigɔ 'bèzè. I'bè yaga ta kala zè.

40 Mo umu kyëti Ranga Yeredene bi mati Yowani ëdi kyere bapatisi ki'di. Mati Yësu ëdi ani,

41 vidi kayo ayinni zi mo. Zë ëdinni akiya henye, “Yowani o'do kyinë 'ba kö'du koro maakowe dë, mora kö'du biya mati mo iya kö'du 'ba Yësu ëdi tinyö.”

42 Vidi kayo naniye i'di koma 'bënni kpa mi Yësu.

11

Koli 'ba Lazara

1 Kora maako ru mo Lazara alëpi na koo mi gawo 'ba Beteniya. Mo ëdi ëmi aba riyö, Mariya ehe Marita.

2 Nenye kpa te Mariya mati yaa ope yëningutru da Yere ehe akyito burutu mo yëvu 'bëni aba.

3 Ëmiyë utunni kö'du kise zi Yësu ehe ayadanni zi mo aboka laka 'bomo Lazara ëdi na rakoo.

4 Mati Yësu owo kö'du nenye iya henye, “Koo 'bomo ne ndundu mo anza dë koli, mora ëdi zi kika wayeto zi Wirä ehe Wisi omo.”

5 Yësu owo Marita, ëmi mo ehe Lazara.

6 Here mati mo owo mo ëdi na koo alima bi mati mo ëdi 'domo ko'do riyö aba löhu.

7 Neene mo iya zi vo lö'bö 'bëniyë henye, “Yaanya aba di'bëe hulëhu Yudiya.”

8 Zë iyanni henye, “Raboni, vidi naniye ombanni zi ku'du yi yitö aba brua! Kö'du a'di omba zi ti'bë hulëhu?”

9 Yësu aya'ba henye, “Kadra anza dë 'butë domoriyö mi ko'do kölö? Èzë alasi mi kadra, bikanyi 'bëyi atëdi kazi kadra ehe otra ndi yi dë.

10 Mora ezë alasi yɔndo aba, akotra ndi yë ga kö'du anza dë bikanyi maako aba.”

11 Neene mo ayada zi zë henye, “Aboka ze Lazara ëdī ako'do, ehe mëdī tī'bë ani zi mo liro.”

12 Zë aya'bannī henye, “Yere ezë mo ëdī ako'do, mo atënyī na laka.”

13 Yësu ëdī ame'do tīnyö kö'du koli 'ba Lazara, mora vo lö'böwë asösu 'bënnī mo ëdī nje ame'do kö'du 'ba ko'do.

14 Here Yësu ayada zi zë huwë, “Lazara oli ku.

15 Ma rakyenyi aba manza dë ani, ga kö'du yaanya aba atëdiyë dɔno aba zi kī'dī koma 'be mī ma. Dī'bëë zi mo.”

16 Toma mati ru rëzë 'bomo ëdī “Loŋa” iya zi vo lö'bö agamowe henye, “Ayiye dī'bëë, here da to'bo koli mo aba.”

Yësu injë Lazara na didī

17 Mati Yësu oko Beteniya, mo i'ja Lazara ëdī ku nzo mī dawogo ko'do sowo aba.

18 Beteniya ëdī tisiwa aba ta da wiri wota ta Yerusalem,

19 ehe Yuda kayo ayinnī ta gawo kyedre zi da Marita ehe Mariya lëlu ga kö'du öndu zë oli ku.

20 Mati Marita owo henye Yësu oko ku, mo i'bë yaga zi dɔ mo kutrë, mora Mariya alima 'bënnī loko.

21 Marita iya zi Yësu henye, “Yere, ezë yī ëdī kinye, öndu ma oli dë.

22 Gbī le yaanya aba ne ma yolo ku henye Wiri ako'do wa mati ako'jo.”

23 Yësu ayada zi mo iya henye, “Öndu yī akadidī löhu.”

24 Marita aya'ba do mo iya henye, “Ma yolo ku mo atenyi na didi mi ndundu ko'do aba, ezē biya yöku enyi ku.”

25 Yēsu iya zi Marita henye, “Ma ra vidi mati edi yöku kinje zi didi. Vidi biya mati omani mi ma akadidinni, ezē olinni le.

26 Ehe vidi biya mati alimanni ga kö'du 'ba koma mi ma tinyo akolinni de. Oma nenyē ku?”

27 Mo alēzē iya henye, “Oo Yere, moma yi Korisito ra, Wisi 'ba Wiri. Yi ra vidi mati da sösu kö'du mo atayi mi damöku ne.”

Yēsu udu

28 Tapeti Marita iya nenyē, mo i'be liwo iya zi emi ni Mariya, “Raboni edi kinye, ehe mo omba zi yi kongö.”

29 Kandi mati Mariya owo nenyē, mo enyi riyē i'be yaga zi Yēsu.

30 Mo gba yaga ta ra gawo bi mati Marita i'be do mo kutre.

31 Vidi kayo ayinni zi da Mariya lēlu, ehe mati kandi zē ongönni mo ila loko, asösunni mo edi ti'be dawogo zi kudu. Here zē alö'bönni gbö ga ndi mo.

32 Mariya i'be bi mati Yēsu 'dömo. Kandi mati mo ongö mo, alömvö burutu mo iya henye, “Yere, edi kyere kinye, öndu ma oli de.”

33 Mati Yēsu ongö Mariya ehe vidi mati mo aba edinni akudu, mo kö'du sösu aba

34 Ako'jo henye, “Kila i'di ye ida ro mo?” Zē aya'banni henye, “Yere, ayi ongö te.”

35 Yēsu ayeto kudu.

36 Vidi iyanni henye, “Ongö te hala mo öwo Lazara.”

³⁷ Kya zè maakowe iyanni henye, “Mo ayèhu komo 'ba vo komoköndu. Kö'du a'di mo ato'bo dè sesi Lazara kazi koli?”

Yësu injë Lazara tëmì koli

³⁸ Yësu zo kö'du sösu kyedre aba. Here mo i'bë dawogo mati na wöru yitö alulu nbiri ho mo.

³⁹ Neene mo ayada zi vidiyë yitö ne lulu 'de yaga ta ho mo. Mora Marita iya henye, “Yere, ayolo henye, Lazara oli go mo o'do ku sowo, ehe këzi mo atëdi ku na kyënyë.”

⁴⁰ Yësu aya'ba do mo henye, “Gba ma yada dë zi yi henye, ezë ëdi koma aba, akongo bikanyi kyedre 'ba Wiri?”

⁴¹ Tapëti alulu yitö ne ku dakapa, Yësu ongo bi riyë zi komoriyë ehe amötu henye, “Bu, mo'do öwö'di zi yi ga kö'du aya'ba da mötu 'bama.

⁴² Ma yolo ku 'duwi ëdi da mötu 'bama ya'ba. Mora miya nenye, here zi vidi kinye nee koma yi ra utu ma.”

⁴³ Mati Yësu inde mötu ku, mo ako'jo wa gu kyembe aba henye, “Lazara, ayi yaga!”

⁴⁴ Kora mati oli ne ayi gbo yaga. Kala mowe ehe ndi mowe olo mi bongo 'ba wakusu, ehe bongo ayöfu komo mo. Yësu ayada zi vidiyë henye, “Inge mo, ile mo mi'bë.”

Yere 'ba zi kofo Yësu

(Mt 26:1-5; Mk 14:1-2; Lk 22:1-2)

⁴⁵ Vidi kayo mati ayinni zi Mariya, ongönni wa mati Yësu o'do, zë i'dinni koma 'bënni mi mo.

⁴⁶ Maakowe i'bënni zi Farasiye ehe ayadanni wa mati Yësu o'do.

47 Here kyedree 'ba vo karase ehe Farasiye atoto rē nni bi kōlō iyanni henye, “A'di ra da ko'de? Kora nenye ēdī kyinē 'ba kō'du koro ko'do kyɔ.

48 Ęzē da dɔre mo dē yaanya aba, vīdī biya akī'dinni koma 'bēnni mī mo. Neene vīdī 'ba Roma atayinni ehe akayananni yēkēlu dakaŋo 'beze aba.”

49 Ma kōlō maako tēmī zē ru mo Kayafa, mo ra kyedre 'ba vo karase mī kɔɔ nani. Mo ame'do riyē iya henye, “E vīdī nee, anze dē kō'du yolo aba.

50 Ayɔle dē henye, ēdī na laka zi vīdī kōlō koli kō'du vīdīyē, kazi dakaŋo ra yaŋa biya?”

51 Kayafa iya nenye dē na bi dē nī. Kaa kyedre 'ba vo karase mī kɔɔ nani, mo ēdī kumē henye, Yēsu ra akoli kō'du 'ba dakaŋo.

52 Yēsu oli dē nje kō'du dakaŋo 'ba Yude. Mo akoli zi kika vīdī biya 'ba Wirī mati apere rē nni ne zi dɔko bi kōlō.

53 Here mī ko'do nani dagba ani, vīdī ayetonnī mala ko'do zi Yēsu kī'dī zi koli.

54 Ga kō'du mala rɔ mo nenye, Yēsu adɔrɔ lasi toko mī vīdī kayo na dangölō. Mo i'bē mī gawo 'ba Efaremo, mati kara dakapa lipi, ehe mo alima ani vo lö'bō 'bēniyē eti.

55 Ędī ku kara zi karama kadra 'ba laga 'ba koli. Vīdī kayo 'ba Yude mati alimanni yaga tēmī dakaŋo, ayinni mī Yerusalema zi rē nni kɔ'jo ŋbala ga kō'du 'ba karama.

56 Zē omani bi toko kō'du Yēsu. Neene mati zē ēdinni mī yēkēlu, zē ako'jonnī oka ma kōlō

maako henye, “Asösu 'bëyi mo atayi dë kinye mi karama 'ba laga 'ba koli?”

⁵⁷ Kyedre 'ba vo karase ehe Farasiye ayadanni zi vidiyë zi zë yolo, ezë vidi maako temi zë ongo Yësu ku. Nenyë ëdi hala zë asösunni zi mo kiri.

12

Alömu Yësu mi Beteniya

(Mt 26:6-13; Mk 14:3-9)

¹ Ko'do modaka ta komo karama 'ba laga 'ba koli Yësu i'bë hulëhu zi Beteniya, bi mati Lazara alima 'domo, mati mo injë mo temi koli.

² Zë o'donni wakonyo zi mo ani. Marita ra ako'jo. Lazara kolö temi vidi mati ëdinni alima ani da tarabiza Yësu aba.

³ Mariya oba maranji yëningutru ogo kôhi kyedre aba ehe ope burutu Yësu. Mo akyito zë zi teli yëvu 'bëni aba, ehe tato ndili 'ba yëningutru ne, oso mi loko ne.

⁴ Vo lö'bö maako ru mo Yudasi Sikereto ëdi ani, mati mo ra omba ti'bë zi Yësu susu. Mo ako'jo henye,

⁵ “Kö'du a'di yëningutru nenyë ogo dë yaga kôhi ñbiriri lamiwota aba ehe kôhi mo ki'di zi vo leriye?”

⁶ Yudasi tinyö asösu kö'du vo leriye dë. Mo ako'jo kö'du ne ga kö'du mo injë anboro 'ba kôhi ehe mi kadra maako aba akalogo zi ni.

⁷ Yësu aya'ba do mo iya henye, “Ile mo kutu ni aba. Mo ma sesi wa mati mo ëdi mo aba kö'du kadra 'ba ma kusu.

⁸ Atëdiyë 'duwi vo leriye ëti, mora atanze dë 'duwi ma aba.”

Yere zi Lazara kofo

⁹ Vidī kayo ayinnī mati zē owonnī henye Yēsu ēdī ani. Zē ombannī kpa zi Lazara kongɔ ga kö'du Yēsu injē mo tēmī koli.

¹⁰ Here kyedree 'ba vo karase o'dōnnī yeṛe kpa zi Lazara kofo.

¹¹ Mo ra i'dī vidī kayo zi dē nnī koto kazi zē ehe ki'dī koma 'bēnnī mī Yēsu.

Yēsu ödu mī Yerusalema

(Mt 21:1-11; Mk 11:1-11; Lk 19:28-40)

¹² Ko'do ma vere aba vidī kayo ēdinnī mī Yerusalema kö'du 'ba karama. Mati zē owonnī henye Yēsu ēdī tayi kö'du 'ba karama,

¹³ zē obannī mbili 'ba mbirō ehe i'bēnnī yaga zi mo mētē. Zē agbögbö hē nnī henye, “Wayeto zi Wirī! Wirī mī'dī ya'da zi vidī mati ayi mī ru 'ba Yere! Wirī mī'dī ya'da zi Yere 'ba Yiserele!”

¹⁴ Yēsu i'ja makakya aho dɔ mo kaa wayöru iya,

¹⁵ “Vidī 'ba Ziyɔɔ, ere dē! Yere 'be ēdī tayi yaanya aba mo ēdī ataho da makakya.”

¹⁶ Mī dagba mo vo lö'bö 'ba Yēsu ayɔlōnnī dē. Mora tapētī mo irī wayeto kazi Wirī ku, zē asōsunnī henye, wayöru iya nenyē kö'du mo ehe zē o'dōnnī nenyē kö'do mo.

¹⁷⁻¹⁸ Vidī kayo ayinnī zi Yēsu ga kö'du zē ongōnnī mo Lazara ko'jo yaga tēmī dawogo. Zē asesinnī nduwē me'do kö'du mo ehe kö'du koro nenyē. Zē ayinnī zi Yēsu ga kö'du zē ongōnnī kö'du kyinē wakoro mati mo o'do.

¹⁹ Mora Farasiye iyannī zi oka ma kölō henye, “Waako anza dē da tɔ'bo kö'do! Vidī biya mī damöku ne ēdinnī kusu ga Yēsu.”

Girigi maakowe ombanni zi Yesu kongɔ

20 Vidī 'ba Girigi maakowe i'benni Yerusalema zi motu mi kadra 'ba karama aba.

21 Pilipo ta Beteseyida mi Galilaya edi kpa ani. Here ze i'benni zi mo iyanni henye, “Kyedre, domba ze zi Yesu kongɔ.”

22 Pilipo ayada zi Anderiya. Ze riyö ne i'benni zi Yesu ayadanni zi mo.

23 Yesu iya henye, “Kadra yaanya aba oko ku kö'du Wisi 'ba Vidī zi kirī kyedre wayeto.

24 Ma yada tinyö zi ye, ijö 'ba nyenyo mati alēpi dakaŋo atanza de kyɔ ta da ijö ma kölo nje ezē oli. Mora ezē oli, ako'jo nyenyo kyɔ.

25 Ezē ɔwɔ didi yi, akayölu. Ezē ila kö'du 'ba damöku nenyē, aki'di didi ma nburu zi yi.

26 Ezē alitu zi ma, ati'bē ma aba. Vo litu 'bame atēdinni ma aba bi mati ma 'domo. Ezē alitu zi ma, 'Bu ma akoro yi.”

Yesu ame'do kö'du koli beni

27 “Yaanya aba ma mi riti kyedre, ma yolo de a'di ra ma kiya. Mora ma ko'jo 'Bu de zi sesi ma temi kadra 'ba riti nenyē. Tinyö mayi mi damöku kö'du kadra 'ba riti nenyē.

28 Here 'Bu, ika wayeto zi ru yi.” Gu ayi ta komoriyē iya henye, “Mika wayeto ku nzo zi ma, ehe ma ko'do löhu.”

29 Mati vidī kayo nee owonni gu ne, kya ze maakowe asösu 'benni piwo ra. Agamowe asösu 'benni malayika ra ame'do zi Yesu.

30 Here Yesu ayada zi vidī kayo nee, “Gu nani ame'do zi konyiye, anza de ma.

31 Vidī 'ba damöku nenye yaanya aba o'do vurë 'bëzë ku, ehe yere 'ba damöku nenye u'du ku nzo yaga.

32 Èzë umbë ma ku riyë ta dakaño, ma ko'do vidī biya komba zi tayi zi ma."

33 Yësu ëdī ame'do kö'du gëri ma aki'dī nī zi kofu.

34 Vidī kayo nee iyannī zi Yësu henye, "Wayöruwë 'ba kö'du kī'dī ayandi henye, Korisito ne akalima nburu. Hala o'bo kiya henye Wisi 'ba Vidī akinjë riyë zi koli? Èyī ra nenye Wisi 'ba Vidī?"

35 Yësu aya'ba do mo iya henye, "Bikanyi atëdiyë aba nje tisiwa. Alasiye mī bikanyi ëzë ato'be here kazi biköndu akakowe. Kora mati mo alasi mī biköndu, mo ayolo dë nëdī tī'bë kila.

36 Ome mī bikanyi mati ëdiyë aba, here atayiye na gisi 'ba bikanyi."

Vidī ombannī dë zi tēdī koma aba mī Yësu

Tapëtī Yësu iya kö'du nenye, mo ila bi nani i'bë mī bi 'ba rakoho.

37 Mo o'do kyinë 'ba kö'du koro kyö mī kutë vidī kayo, mora zë gba zo ombannī dë zi tēdī koma aba mī mo.

38 Nenye o'do rë nī zi wa mati nēbī Yisaya iya atayi tinyö, "Yere, ëyī ra oma mī kö'du kise 'beze? Ehe ëyī ra ongo kyigo kyedre 'bëyī?"

39 Vidī o'bönnī dë zi tēdī koma aba mī Yësu, ga kö'du Yisaya iya kpa henye,

40 "Wirī isi komo zë here kazi o'bönnī bi kongö, ehe o'do di'di zë na kyigo here zë o'bönnī dë yolo.

Mo o'do nenye here kazi zë a'bannì zi mo ehe kò'jo zë."

⁴¹ Yisaya iya nenye, ga kö'du mo ongo bikanyi kyedre 'ba Yësu ame'do kö'du mo.

⁴² Here vo dagba kayo 'ba Yude kayo i'dinnì koma 'bënnì mī Yësu, mora zë ayadannì dë zi vidì maako, ga kö'du Farasiye i'dinnì kö'du ku nzo zi vidiyë anza dë zi wa maako ko'do zi vidì maako mati ëdì koma aba mī Yësu.

⁴³ Vo dagbe ombannì wayeto kazi agamowe ndra ta da mati zë ombannì wayeto kazi Wirì.

Yësu ayi zi damöku yomo

⁴⁴ Mī gu kyembe aba Yësu iya henye, "Vidì mati ëdì koma aba mī ma, ëdì kpa koma aba mī vidì mati utu ma.

⁴⁵ Ehe vidì mati ongo ma, ongo vidì mati utu ma ne ku.

⁴⁶ Ma bikanyi mati ayi mī damöku. Vidì mati ëdì koma aba mī ma, alima dë mī biköndu.

⁴⁷ Ma ra dë vidì mati ako'do vurë kyënyë 'ba vidì naniye mati ombannì dë zi koro kö'du yandi 'bama. Mayi zi yomo vidì 'ba damöku nenye, anza dë vo ko'do vurë kyënyë 'bëzë.

⁴⁸ Mora vidì mati omba ma dë ehe wayandi 'bama, ako'do vurë kyënyë ro mo mī ndundu 'ba ko'do aba, mī wa mati miya.

⁴⁹ Manza dë me'do ga kö'du 'bama. Miya nje wa mati 'Bu mati utu ma ayada zi ma kiya.

⁵⁰ Ma yolo ku kö'du kī'di omo akika didi ma ḡburu. Nenye ëdì hala ma yada zi ye te wa mati 'Bu ayada zi ma."

13

Yësu akaka burutu 'ba vo lö'bö 'bëniyë

¹ Gba ta komo karama 'ba laga 'ba koli, Yësu ayɔɔ henye kadra ne ɔko ku kö'du nĩ zi kila damöku nenyë ehe zi ta'ba zi 'Bu. 'Duwĩ mo ɔwo vo lö'bö 'bëniyë mi damöku nenyë, ehe mo ɔwo zë le mi ndundu.

² Gba kazi biyeto 'ba wakonyo 'ba hutaga, Satani o'do Yudasi, wisi 'ba Simona Sikereto, omba zi Yësu susu.

³ Yësu ayɔɔ nayi kazi Wiri ehe na ti'bë hulëhu zi Wiri. Mo ayɔɔ kpa henye, 'Bu i'di kyigo ku biya zi ni.

⁴ Here kadra 'ba wakonyo aba Yësu ënyi riyë, mo oto bongɔ 'ba rë ni ma ta yaga, ehe olo bongoroteli toko bi ko'di kida 'ba gë ni.

⁵ Mo i'di wini mi siko kyedre. Here mo ayeto burutu vo lö'bö 'bëniyë kaka ehe kyitru zë bongoroteli mati mo usu ne aba.

⁶ Mora mati mo ayi zi Simona Petero, ako'jo henye, "Yere, ëdi ti'bë zi burutu ma kaka?"

⁷ Yësu aya'ba iya henye, "Tinyö ayɔɔ wa mati mëdi ko'do ne dë, mora yaa akayɔɔ."

⁸ Petero aya'ba henye, "Akaka burutu ma dë!" Yësu ayada zi mo henye, "Ëzë ma kaka yi dë, tinyö anza dë 'bama."

⁹ Simona Petero aya'ba do mo iya henye, "Yere, akaka dë nje burutu ma, akaka kala ma da ma aba!"

¹⁰ Yësu aya'ba henye, "Vidi mati akaka rë nni ku ehe ëdinni ku biya nbala omba nje zi burutu zë ra kaka. Ehe e vo lö'bö 'bame, ëdiyë nbala nje vidi kölö temi yë."

11 Yësu ayɔlɔ ɛyɪ ra akasusu nɪ. Kɔ'du nere ra mo iya henye, nje zi ma kɔlɔ tɛmɪ yɛ.

12 Tapɛtɪ Yësu akaka burutu vo lɔ'bɔ 'bɛnɪyɛ ehe usu bɔngɔ 'bɛnɪ ma ta yaga ne hulɛhu, mo alima akaŋɔ lɔhu. Here mo iya henye, "Ayɔle wa mati mo'dɔ zi ye ne ku?"

13 Ako'jowe ma Raboni 'be ehe Yere, ehe akiye here, ga kɔ'du nani ɛyɪ ra ma.

14 Ɖzɛ Yere 'be ehe vo komoyandi akaka burutu wɛ, o'de kpa te here zi oka ma kɔlɔ maako.

15 Ma yada gɔ mo ku, ehe o'de zi oka ma kɔlɔ maako te wa mati mo'dɔ zi ye.

16 Ma yada tɪnyɔ zi ye henye, vo lituwɛ anzannɪ dɛ kyedre ta da vo dɛ nnɪ, ehe vo litu kike anzannɪ dɛ kyedre ta da vidɪ mati utu zɛ ne.

17 Ayɔle wa nenyee ku. Wirɪ akɪ'dɪ ya'da zi ye, ɛzɛ o'de zɛ."

18 "Manza dɛ ame'do kɔ'du wɛ biya. Ma yɔlɔ zɛ mati ma jeli ne ku. Mora wa mati wayɔru iya, atayi tɪnyɔ. Mo iya henye, 'Kora mati onyo wa ma aba ne, opi rɛ nɪ ku na vo wehe ra ma.'

19 Mɛdɪ yada nenyee zi ye biya gba kazi rɛ nɪ ko'dɔ, here ɛzɛ o'dɔ rɛ nɪ ku, akome ɛyɪ ra ma.

20 Ma yada tɪnyɔ zi ye, vidɪ mati ɪrɪ vo litu 'bame kalakyedre aba, ɪrɪ ma kpa kalakyedre aba, ehe vidɪ mati ɪrɪ ma kalakyedre aba, ɪrɪ ne vidɪ mati utu ma."

Yësu ayada wa ma ako'dɔ rɛ nɪ zi nɪ

(Mt 26:20-25; Mk 14:17-21; Lk 22:21-23)

21 Tapɛtɪ Yësu iya kɔ'du nenyee, mo riti kyedre aba ehe ayada zi vo lɔ'bɔ 'bɛnɪyɛ henye, "Ma

yada tinyö zi ye henye, vidi ma kölö temi ye akasusu ma.”

²² Dë zë wiriwiri kö'du wa mati mo iya ne. Zë nje bi kongö aba da oka ma kölö.

²³ Yësu ɔwɔ vo lö'bö mati ëdi alima kara zi ni bi 'ba wakonyo,

²⁴ ehe Simona Petero o'do kala ni zi vo lö'bö nenye zi ki'ja ma vala ra Yësu ame'do kö'du mo.

²⁵ Here vo lö'bö ne idë rë ni zi Yësu ehe ako'jo henye, “Yere, ma vala ra temi ze ëdi ame'do kö'du mo?”

²⁶ Yësu aya'ba iya henye, “Ma kusu nzoyi mangö'bo nenye mi gbenje ehe ki'di zi vidi mati mëdi ame'do kö'du mo.” Here Yësu usu mangö'bo gbo ehe i'di zi Yudasi, wisi 'ba Simona Sikereto.

²⁷ Kandi Satani aya'ja da Yudasi. Yësu iya henye, “Yudasi, i'bë kandi o'do wa mati zi yi ko'do.”

²⁸ Vidi maako bi 'ba wakonyo ne ayö'bo kö'du mati Yësu iya ne dë.

²⁹ Mora ga kö'du Yudasi ra na vo köhi sesi, kya zë maakowe asösunni henye Yësu ayada zi mo zi kogo wa mati zë ombanni kö'du karama. Agamowe asösunni henye Yësu ayada zi mo zi köhi ki'di zi vo leri.

³⁰ Yudasi oba nzoyi mangö'bo, i'bë yaga. Eëdi ku nzo yondo.

Kö'du ki'di kyiyi

³¹ Tapëti Yudasi i'bë ku Yësu iya henye, “Yaanya aba Wisi 'ba Vidi aki'di wayeto, ehe mo akika wayeto zi Wiri.

³² Here tapëti Wirī akiri wayeto ku ga kö'du mo, Wirī aki'di wayeto zi mo, ehe Wirī ako'do kandi.

³³ Gisi ame, ma tēdiyē aba nje tisiwa aba na konda. Here akome ma, mora aki'je ma dē. Ma yada zi ye kpa kaa ma yada zi Yude. 'Ɔ'be dē tī'bē bi mati mēdi atī'bē.'

³⁴ Mora mēdi kö'du kī'di kyiyi kī'di zi ye: ɔwe oka ma kölō maako, kpa te kaa mati mɔwɔ e.

³⁵ Èzē ɔwe oka maakowe mi gēri nēnye, vidi biya akayɔlɔnni e vo lö'bō 'bama ra."

Lömu 'ba Petero

(Mt 26:31-35; Mk 14:27-31; Lk 22:31-34)

³⁶ Simona Petero ako'jo henye, "Yere, ēdi tī'bē kila?" Yēsu aya'ba henye, "Ɔ'bo dē tī'bē ma aba yaanya aba, mora yaa dagba ani atī'bē."

³⁷ Petero ako'jo henye, "Yere, kö'du a'di mɔ'bo dē tī'bē yi aba yaanya aba? Ma koli kö'du yi!"

³⁸ Yēsu ako'jo henye, "Tīnyō akoli kö'du ma? Ma yada zi yi tīnyō, gba kazi zanga yēru yapa, akiya da wota henye ayɔlɔ ma dē."

14

Yēsu gēri ra zi 'Bu

¹ Yēsu iya zi vo lö'bō 'bēniyē henye, "Asösuwē kö'du dē. Èdiyē koma aba mi Wirī. Ome kpa mi ma.

² Loko kayo ēdi mi liɔ 'ba 'Bu ma. Ma yada nēnye dē zi ye, èzē anza dē tīnyō. Mēdi tī'bē ani zi bi kɔ'ɔ biya zi ye na kölō kölō.

³ Tapëti mo'do nēnye ku, ma ta'ba hulēhu kobe ma aba. Here da tēdi ze ga bi kölō.

4 Ayole gëri mati mëdi ati'bë zi mo ne ku.”

5 Toma iya henye, “Yere, da yolo də ëdi ati'bë kila! Hala da to'bo yolo gëri ne?”

6 Yësu aya'ba henye, “Ma gëri, tînyö, ehe dïdi! Kazi ma, vïdi maako o'bo də ti'bë zi 'Bu.

7 Èzë tînyö ayole ma, akayole 'Bu. Mora tēmī ndenye dagba ani, ayole mo ku, ehe onge mo ku.”

8 Pilipo iya henye, “Yere, ayada zi ze 'Bu ne, nani biya wa mati domba.”

9 Yësu aya'ba henye, “Pilipo, mëdi yi aba kadra konda aba ayolo də ma ëyi? Èzë ongo ma, ongo 'Bu ku. Hala ato'bo ha ma ko'jo zi yada 'Bu zi ye?

10 Oma də henye, ma kōlō 'Bu aba ehe 'Bu kōlō ma aba? Wa mati miya, miya də kō'du ma. 'Bu mati alima mi ma, ra o'do wa nenye.

11 Ome mi ma ezë miya henye, 'Bu kōlō ma aba ehe ma kōlō 'Bu aba. Mandere ome mi ma kpa nje ga wa mati mëdi ako'do.

12 Ma yada tînyö zi ye henye ezë ëdiyë koma aba mi ma, ako'de kpa te wa mati mëdi ako'do. Ako'de wa kyedre maakowe ndra, ga kō'du mëdi ku ti'bë hulëhu zi 'Bu.

13 Ako'jowe ha ma, ehe ma ko'do wa mati ako'jowe kō'du mo. Gëri nenye aba, Wisi akika wayeto zi 'Bu.

14 Ma ko'do wa mati ako'jowe ha ma zi ko'do mi ru ma.”

Alömu zi kutu Lawo Laka

15 Yësu iya zi vo lö'bö 'bënyë henye, “Èzë owe ma, ako'de kaa mi'di kō'du mo.

16 Here ma kako'jo ha 'Bu zi kutu zi ye Lawo Laka mo akakonyiye ehe 'duwi atëdiyë aba.

17 Lawo Laka akayada zi ye wa mati tinyö. Vidi 'ba damöku nenyé ɔ'bɔnni dë kiri Lawo, ga kö'du zë ongɔnni dë mandere yɔɔ mo. Mora ayole Lawo ku, ga kö'du mo ëdiyë aba ehe akasesi lima nduwë mi yë.

18 Ma kile dë kaa wala. Ma tayi hulëhu zi ye.

19 Tisiwa aba vidi mi damöku nenyé ɔ'bɔnni dekpe zi ma kongɔ, mora akonge ma. Ehe ga kö'du ma lima, akalime.

20 Here akayole ma kölö 'Bu aba. Akayole, e kölö ma aba, ehe ma kölö ëti.

21 Èzë ɔwe ma, ako'de wa mati miya, ehe 'Bu atɔwɔ e. Ma katɔwɔ e kpa ehe yada zi ye ma kaa a'di."

22 Yudasi ma agamo anza dë Yudasi Sikereto, ame'do riyë ako'jo kö'du henye, "Yere, mi me'do 'bëyi ne a'di akayada zi ze yi kaa a'di, mora ayada dë zi vidi 'ba damöku nenyé?"

23 Yësu aya'ba henye, "Èzë vidi maako ɔwɔ ma, zë akorɔnni ma. Here 'Bu ma akatɔwɔ zë, da katayi zi zë ehe lima mi zë.

24 Mora vidi mati ɔwɔ ma dë, oro ma dë. Wa mati owowe miya tinyö ayi dë kazi ma, mora kazi 'Bu mati utu ma."

25 "Ma yada kö'du nenyee zi ye, mati ma gba ëti.

26 Mora Lawo Laka atayi akakɔnyiye. Lawo Laka mati 'Bu ma akutu mi ru ma, akayandi wa biya zi ye ehe ako'de zi sösü wa biya mati ma yada zi ye."

27 "Mi'di rakyëyi zi ye, kyinë 'ba rakyëyi mati nje ma tɔ'bo ki'di. Anza dë kaa rakyëyi

mati damöku nenyë akî'dî. Here asösuwë dë mandere tere.

²⁸ Owowe ma ku nzo kiya henye, mëdî atî'bë ehe ma tayi kpa hulëhu zi ye. Èzë tînyö ɔwe ma, ëdiyë rakyenyi aba mëdî ku tî'bë hulëhu zi 'Bu, ga kö'du mo ëdî kyedre ta da ma.

²⁹ Mëdî yada zi ye nenyë gba kazi ma tî'bë, here ëzë o'do rë nî, atëdiyë koma aba mî ma.

³⁰ Mɔ'bo dekpe me'do ëtî na konda, ga kö'du yere 'ba damöku nenyë ëdî tayi. Mora mo anza dë kyigo aba da ma.

³¹ Moro wa mati 'Bu ma ayada zi ma ko'do, here zi vîdî biya mî damöku ne akayolonnî mowɔ mo. Èdî ku kadra 'ba zi ze tî'bë yaanya aba.”

15

Yësu tînyö kaga tana

¹ Yësu iya zi vo lö'bö 'bëniyë henye, “Ma tînyö kaga tana, 'Bu ma ra vo kyeti yaka.

² Mo iga ngora 'bama biya mati anannî kolo dë yaga. Mora mo ikye nbala biya da ngora mati ëdî tana kolo, here zi tana kolo kyɔ.

³ E ku nzo nbala ga kö'du wa mati miya zi ye.

⁴ Alime na rakida zi ma, ehe ma kalima na rakida zi ye. Te kaa ngora ɔ'bo dë tana kolo nje ëzë alima na rakida zi kaga, here ɔ'be dë tana kolo nje ëzë alime na rakida zi ma.”

⁵ “Ma kaga ra, e ngora ra. Èzë alime na rakida zi ma, ehe ma kalima na rakida zi ye tane kolo kyɔ. Mora ɔ'be dë wa maako ko'do kazi ma.

⁶ Èzè alime dè na rakida zi ma, aku'duwè yaga. Atèdiyè kaa ngora kyitru mati atoto bi kòlò ehe o'bo mi wa'do.

⁷ Èzè alime na rakida zi ma ehe kò'du yandi 'bama mayi na kapa 'be, here ato'bo mötuwè ga wa mati ombe, ehe mötu 'be akaya'ba do mo.

⁸ Èzè ayiye ku na kolo laka 'ba vo lö'bö 'bame, akoro 'Bu ma. Ne akayada henye, e vo lö'bö 'bame.

⁹ Mowo e kaa 'Bu ma owo ma. Here alime mi watowo 'bama.

¹⁰ Èzè orowe ma, ma kasesi towo e kaa 'Bu ma asesi towo ma, ga kò'du moro mo."

¹¹ "Ma yada nenyè zi ye, zi ye tēdiyè mi rakyenyi 'bama ma nburu.

¹² Yaanya aba ma yada zi ye zi towo oka ma kòlò maako kaa mowo e.

¹³ Gèri ma laka ndra zi yada watowo kò'du aboke, èdì zi koli kò'du zè.

¹⁴ E aboka ma ra, èzè orowe ma.

¹⁵ Ma ko'jowe dè vo litu 'bame, ga kò'du vo litu ayolonnì dè a'di ra kyedre 'bèzè èdì ako'do. Ma me'do zi ye kaa aboka me, ga kò'du ma yada ku biya zi ye wa mati 'Bu ma ayada zi ma.

¹⁶ E ra dè ajeliye ma, ma ra ma jeliye kutu yaga zi tana kolo, kyinè 'ba kolo ma akalima nburu. Here 'Bu ma aki'di zi ye wa mati ako'jowe kazi mo mi ru ma.

¹⁷ Here mi'di kò'du zi ye zi towo oka ma kòlò."

Damöku 'ba rakiyi

¹⁸ "Èzè vidì 'ba damöku nenyè ayiye, asösuwè henye zè iyinnì ma dagba.

¹⁹ Ęzē e zi damōku, vīdī 'bōmo atōwe. Mora anze dē zi damōku. Ma jeliye zi damōku nenyē kila hulēhu. Kō'du nenyē ra vīdī 'bōmowe ēdīnnī ye kiyi.

²⁰ Asōsuwē hala ma yada zi ye henye vo lītu anzannī dē kyedre ta da kyedre 'bēnnī. Here ēzē vīdī o'dōnnī ma na kyēnyē, zē ako'dōnnī yē na kyēnyē. Ęzē zē oronnī kō'du yandi 'bama, zē akoronnī 'be.

²¹ Vīdī ako'dōnnī kpa te zi ye wa mati zē o'dōnnī zi ma. Zē ako'dōnnī ga kō'du e zi ma, ehe zē ayolōnnī vīdī mati utu ma ne dē.

²² Ęzē mayi dē ame'do zi zē, o'dōnnī vurē kyēnyē dē rē zē. Yaanya aba zē o'bōnnī dē kiya anzannī ra dē.

²³ Vīdī mati iyi ma iyi 'Bu ma kpa.

²⁴ Mo'do wa maakowe vīdī maako gba o'do dē. Ęzē zē ongōnnī ma dē wa nenyee kō'do, o'dōnnī vurē kyēnyē dē rē zē. Mora zē ongōnnī ma wa nenyee kō'do, ehe zē zo ma kiyi ehe 'Bu ma kpa.

²⁵ Nenyē ra hala wayōru ēdīnnī tīnyō mati zē iyannī henye, vīdī iyinnī ma ōᅇbō kazi kō'du mo."

²⁶ "Ma kutu zi ye Lawo mati ayi kazi 'Bu ehe ayada wa mati tīnyō. Lawo Laka akakōnyīye ehe akayada kō'du ma zi ye.

²⁷ Here akayade kō'du ma kpa zi oka maakowe, ga kō'du ēdīyē ma aba tēmī biyeto."

16

¹ "Mēdī yada zi ye wa nenyee, here kazi oto de 'de.

² Akore yaga tëmī bi 'ba mötu, ehe kadra atayi mati vīdī akofonniyē, ehe zē asösunnī, nēdinnī kö'du laka ra ko'do zi Wīri.

³ Zē ako'donni wa nenyee ga kö'du zē ayolōnnī 'Bu mandere ma dē.

⁴ Mēdi akiya nenyē zi ye yaanya aba, here ēzē kadra ne ayi ku akasösuwē wa mati miya.”

Loo 'ba Lawo Laka

“Ma mēdi ēti tëmī dagba, ehe here ma yada wa nenyee dē zi ye.

⁵ Mora yaanya aba mēdi ku tī'bē hulēhu zi 'Bu mati utu ma, ehe vīdī maako tëmī yē ako'jo ha ma dē mēdi tī'bē kila.

⁶ E kazi rakyenyi biya ta bi kö'du nenyē kowo.

⁷ Mora ma yada zi ye, mēdi tī'bē zi ko'do wa mati ēdī na laka kö'du wē. Kö'du nenyē ra mēdi tī'bē 'de. Lawo Laka o'bo dē tayi zi ye konyi le ēzē mile ku. Mora tapētī mī'bē ku, ma kutu mo zi ye.

⁸ Lawo atayi akayada zi vīdī 'ba damöku nenyē kö'du tīnyō kö'du yaṅa ehe kö'du laka 'ba Wīri ehe vurē.

⁹ Lawo akayada zi zē henye, zē 'ba kö'du kyēnyē ko'do, ga kö'du zē anzannī dē koma aba mī ma.

¹⁰ Zē na litē kö'du wa 'ba Wīri mati ēdī tīnyō na laka, ga kö'du mēdi tī'bē zi 'Bu, onge ma dekpe löhu.

¹¹ Ehe zē na litē kö'du 'ba vurē, ga kö'du Wīri ikye vurē 'ba yere 'ba damöku nenyē ku nzo.

¹² “Mēdi kö'du aba kyō zi kiya zi ye, mora yaanya aba atēdī ndra ta da mati ato'be yolo.

13 Lawo ayada wa mati t̄inyö ehe atayi gage m̄i t̄inyö ma ndo. Lawo ame'do d̄e ga kö'du n̄i. Mo akayada zi ye nje wa mati mo owo kazi ma, ehe mo ako'do zi ye yolo a'di ra ëd̄i t̄i'b̄e zi r̄e n̄i ko'do.

14 Lawo ak̄i'd̄i wayeto zi ma kö'du kise 'bama koba ehe yada mo zi ye.

15 Wa biya mati 'Bu ëd̄i mo aba 'bama ra. Kö'du n̄enye ra miya henye Lawo oba kö'du kise 'bama ehe yada mo zi ye."

Kö'du sösu akopi r̄e n̄i m̄i rakyenyi

16 Ȳesu ayada zi vo lö'bö 'b̄en̄iȳe, "Tisiwa aba, onge ma dekpe, mora tap̄eti mo tisiwa akonge ma."

17 Z̄e iyann̄i zi oka ma kölö maako henye, "A'di ra Ȳesu iya henye, tisiwa aba donge mo d̄e, mora tap̄eti mo tisiwa aba, da kongo ze mo? Kö'du a'di ra mo iya henye, n̄ed̄i t̄i'b̄e zi 'Bu?

18 A'di ra 'b̄en̄i n̄enye tisiwa aba, mati mo ëd̄i ame'do kö'du mo? Da yolo d̄e a'di ra mo ame'do kö'du mo."

19 Ȳesu ayolo z̄e ëd̄inn̄i kö'du ko'jo maakowe aba, here mo iya henye, "E na rasösu a'di ra ma me'do kö'du mo mati miya henye tisiwa aba onge ma d̄e, mora tap̄eti mo tisiwa aba akonge ma.

20 Ma yada zi ye t̄inyö henye, akuduw̄e ehe at̄ed̄iȳe kazi rakyenyi, mora damöku at̄ed̄i rakyenyi aba. At̄ed̄iȳe kazi rakyenyi, mora yaa at̄ed̄iȳe na rakyenyi.

21 Èz̄e mbara omba ku zi ko'jo, mo ëd̄i m̄i watoo kyedre. Mora tap̄eti ko'jo, watoo ne ölu ta do mo ehe na rakyenyi, ga kö'du mo ika wisi ku m̄i damöku ne.

22 E yaanya aba kazi rakyenyi, mora yaa ma konge, ehe atëdiyë na rakyenyi. Vidï maako ɔ'bo dë zi kobe ta gëri mati asösuwë.

23 “Èzë kadra nani ayi ku, ako'jowe ha ma dë kö'du wa maako. Ma yada tinyö zi ye henye, 'Bu akï'di zi ye wa mati ako'jowe kö'du mo mi ru ma.

24 Ako'jowe kö'du wa maako dë gba mi gëri nenye. Mora yaanya aba ako'jowe mi ru ma ehe akiriyë.”

Ta'da Damöku

25 “Ma me'do ha kahi aba zi yada wa nenyee zi ye. Mora kadra mo atayi mati ma kame'do dekpe ha kahi aba, mora ma kame'do zi ye huwë kö'du 'ba 'Bu.

26 Akako'jowe ha 'Bu mi ru ma. Ma kako'jo ho mo dë zi ye.

27 Wiri 'Bu owe ga kö'du owe ma, ehe ome mayi kazi mo.

28 Mayi ta ra 'Bu mi damöku ne, mora mëdi ku damöku ne kila ta'ba zi 'Bu.”

29 Vo lö'böwë iyanni henye, “Yaanya aba ëdi ku ame'do huwë zi ze! Anza dë ame'do ha kahi aba.

30 Ndundu mo aba da yolo ku henye, ayolo wa biya, ehe omba dë zi vidï hë yi ko'jo. Yaanya aba doma tinyö ayi ta ra Wiri.”

31 Yësu aya'ba henye, “Tinyö yaanya ome ma ku?

32 Kadra atayi ehe ëdi ku nzo kinye, mati akapere biya. Vidï biya na kölö kölö tēmi yë ati'bë hulëhu lijo ehe akila ma na bi da ma. Mora 'Bu atëdi ma aba, ma tanza dë kutu ma aba.

³³ Ma yada nenye zi ye, zi ye tëdiyë rakyëyi aba mi di'di ye ga kö'du ma. Èzë ëdiyë mi damöku ne, atëdiyë riti aba. Mora ëdiyë kazi tere, ma'da damöku ne ku."

17

Yësu amötu kö'du vo lö'bö 'bëniyë

¹ Tapëti Yësu inde me'do ku zi vo lö'bö 'bëniyë, mo ongo bi riye komoriyë ehe amötu, "'Bu, kadra oko ku zi yi ki'di wayeto zi Wisi 'bëyi, here zi mo ki'di wayeto zi yi,

² ga kö'du i'di kyigo ku zi mo ta da vidi biya, here mo aki'di didi ma nburu zi vidi biya mati i'di zi mo.

³ Didi ma nburu edi zi yolo yi, Wiri ma nje tnyö, ehe zi yolo Yësu Korisito, mo mati utu.

⁴ Mi'di wayeto zi yi kinye dakaño zi ko'do wa biya i'di zi ma ko'do.

⁵ Yaanya aba 'Bu, i'di hulëhu zi ma wayeto mati medï mo aba yi aba gba damöku ne o'do dë.

⁶ "I'di vo lö'bö maakowe ku zi ma temï damöku nenye ehe ma yada zi zë, yi kaa a'di. Zë 'bëyi ra, mora i'di zë zi ma, ehe zë oronnï yi.

⁷ Zë ayolonnï henye, i'di zi ma biya wa mati medï mo aba.

⁸ Ma yada zi vo lö'bö 'bame wa mati ayada zi ma, ehe zë ombannï do mo. Zë ayolonnï mayi kazi yi, ehe zë omannï yi ra utu ma.

⁹ "Medï amötu kö'du zë, mora anza dë kö'du zë 'ba damöku nenye. Vo lö'bö 'bame 'bëyi ra, ehe medï amötu kö'du zë.

¹⁰ Biya mati mēdi mo aba 'bēyi ra, ehe biya mati ēdi mo aba 'bama ra, ehe zē i'dīnni wayeto zi ma.

¹¹ 'Bu laka, manza dekpe na konda mi damöku ne, mēdi tayi zi yi, mora vo lö'bö 'bame gba mi damöku ne. Agaga gē zē kyigo 'ba ru yi aba, mati i'di zi ma ne aba, here zē atēdīnni kōlō oka ma kōlō maako aba, kpa kaa yi ehe ma kōlō.

¹² Mati mēdi zē eti, ma sesi zē na laka kyigo mati i'di zi ma ne aba. Mongo gē zē ehe ma kōlō tēmi zē ölu dē, nje ma kōlō mati mo ra omba zi tölu. Nenye o'do rē ni here zi wa mati wayöru iya zi tayi tīnyö.

¹³ Ma ku da gēri ama zi yi, mora miya kö'du nenye mati ma gba mi damöku, here vo lö'bö 'bame atēdīnni kpa te rakyenyi biya mati mo'do aba.

¹⁴ Ma yada kö'du kise 'bēyi ku zi zē, mora vidi 'ba damöku nenye iyi zē, ga kö'du zē anzanni dē zi damöku nenye, kpa te kaa manza dē.

¹⁵ 'Bu, ma ko'jo hē yi dē zi koba vo lö'bö 'bame yaga tēmi damöku ne, mora agaga gē zē kazi Satani.

¹⁶ Zē anzanni dē zi damöku nenye, ehe ma kpa.

¹⁷ Me'do 'bēyi ra ēdi tīnyö. Here i'di tīnyö nenye, mo'do zē biya na 'bēyi.

¹⁸ Mēdi zē kutu mi damöku, kaa utu ma.

¹⁹ Mi'di ra ma ku biya zi yi ga kö'du 'bēzē, here zē mēdīnni biya zi yi mi tīnyö.

²⁰ "Manza dē nje amötu kö'du vo lö'bö nenye. Mēdi kpa amötu kö'du vidi biya mati zi tēdīnni koma aba ga kö'du wa mati vo lö'bö 'bame akiyanni kö'du ma.

²¹ 'Bu, momba zë biya zi tēdi kōlō oka ma kōlō maako aba, kpa kaa ma kōlō yī aba, ehe yī kpa kōlō ma aba. Ma kpa momba zë zi tēdi kōlō ze aba, here vīdī 'ba damōku nenyē akomannī henye, yī ra utu ma.

²² Moro vo lō'bō 'bame mī gērī kōlō oro ma, zë mēdīnnī kōlō oka ma kōlō maako aba kaa ze kōlō.

²³ Ma kōlō zë aba, ehe yī kōlō ma aba, here zi zë tayinnī biya kōlō. Here vīdī 'ba damōku nenyē akayōlōnnī henye, yī ra utu ma. Zë akayōlōnnī henye, ɔwɔ vo lō'bō 'bame kpa kaa ɔwɔ ma.

²⁴ "'Bu, momba vīdī biya mati i'dī zi ma zi tēdi ma aba, bi mati mēdī 'dōmo. Neene zë akongōnnī bikanyi kyedre mati i'dī zi ma, ga kō'du ɔwɔ ma gba o'do damōku dē.

²⁵ 'Bu laka, vīdī 'ba damōku nenyē ayōlōnnī yī dē, mora ma yōlō yī, ehe vo lō'bō 'bame ayōlōnnī henye yī ra utu ma.

²⁶ Ma yada zi zë, yī kaa a'di, ehe ma kayada zi zë nduwē, here watōwɔ mati ēdī mo aba kō'du ma akatayi kapa 'bēzē, ehe ma tēdi kōlō zë ētī."

18

Kiri 'ba Yēsu

(Mt 26:47-56; Mk 14:43-50; Lk 22:47-53)

¹ Mati Yēsu inde mōtu ku, mo vo lō'bō 'bēnī ētī umunnī kyētī gulu 'ba Kidrono ehe i'bē mī yaka maako.

² Yēsu ēdī 'duwī rē nni ki'ja vo lō'bō 'bēnī ētī ani, ehe Yudasi ayōlō bi ne.

³ Here Yudasi i'bē zi yaka ne kya 'ba vo kanye 'ba Roma ētī ehe vo kanye 'ba yēkēlu, kyedre 'ba

vo karase ehe Farasiye ra utunnī zē. Zē injēnnī wa'do zi bi yanyi ehe wa 'ba wehe.

⁴ Yēsu ayɔɔ kō'du mati omba zi ti'bē rē nī ko'do ne ku nzo, mora mo ako'jo henye, “Ēyī ra ēdiyē koma?”

⁵ Zē aya'bannī henye, “Dēdī koma Yēsu 'ba Nazereta!” Yēsu ayada zi zē henye, “Ma Yēsu ra!” Yudasi vo susu ēdī tɔɔ ani dakapa zē.

⁶ Kandi zē biya a'bannī kɔwɔ hulēhu ehe alēpinnī dakaŋo.

⁷ Yēsu ako'jo kō'du löhu henye, “Ēdiyē ēyī ra koma?” Zē aya'bannī do mo iyannī henye, “Dēdī ze koma Yēsu 'ba Nazereta.”

⁸ Kadra nenyē aba Yēsu aya'ba henye, “Ma yada ku nzo zi ye ma Yēsu ra. Ēzē ma ra ēdiyē akoma, ile vidī maakowe mī'bēnnī.”

⁹ Here wa biya ako'do rē nī, kaa mo iya, “Ma yölu vidī ma kölö mati i'dī zi ma ne dē.”

¹⁰ Simona Petero ika kulu nī aba. Mo otɔ yaga tēmī silikpa ehe otra Malahisi, vo litu 'ba kyedre 'ba vo karase, ehe iga mbili mo ma da tirī ŋbīriku yaga.

¹¹ Yēsu iya zi Petero henye, “I'dī kulu 'bēyī ne karani. Ma kuwē tēmī siko mati 'Bu i'dī zi ma.”

Ika Yēsu zi Anasi

¹² Vo kanye 'ba Roma ehe vo kyēlu 'bēnnī eti, ehe vo kanye 'ba yēkēlu eti, irinnī Yēsu ehe idannī mo gö.

¹³ Zē obannī mo dagba zi Anasi, mo yawo 'ba Kayafa, kyedre 'ba vo karase mī kɔɔ nani.

14 Kayafa kölö nenye ra ayada zi kyedree 'ba Yude henye, “Èdì na laka èzè vidi kölö maako oli kö'du vidi biya.”

Petero iya henye na yɔɔ Yësu dë

(Mt 26:69-70, Mk 14:66-68, Lk 22:55-57)

15 Simona Petero ehe vo lö'bö maako aba usu ga Yësu. Vo lö'bö nani ayɔɔ kyedre 'ba vo karase, ehe usu ga Yësu le mi liɔ 'ba kyedre 'ba vo da karasa.

16 Petero alima yaga kara haresi. Mora vo lö'bö maako ayi hulëhu yaga ehe ame'do zi wu'jè 'ba haresi ne henye, “Mo mila Petero ti'bè loko.”

17 Mora ako'jo ho mo henye, “Anza dë kölö tëmi vo lö'bö 'ba kora nani?”

Petero aya'ba do mo iya henye “E e manza dë.”

18 Gabi na kyëyi ehe vo lituwë ehe vo kanye 'ba yëkëlu adrɔkonnì wa'do kalili. Zë èdinni rë nnì koye toko ta ro mo, mati Petero i'bè ehe ɔɔ kara dakapa wa'do zi rë nì koye.

Kyedre 'ba vo karase ako'jo ha Yësu

(Mt 26:59-66, Mk 14:55-64, Lk 22:66-71)

19 Kyedre 'ba vo karase ako'jo ha Yësu kö'du vo lö'bö 'bomowe ehe kö'du yandi 'bomo.

20 Mora Yësu ayada zi mo henye, “Ma me'do na dangölö ta da komo vidi biya, ehe 'duwi mëdi kö'du yandi mi bi 'ba mötu 'beze ehe mi yëkëlu, bi ma Yude ayinni biya bi kölö. Miya kö'du maako dë na koho.

21 Kö'du a'di ra èdì ha ma ko'jo? Kö'du a'di ako'jo ha vidi mati owonnì ma ne dë? Zë ayɔɔnnì wa mati miya.”

²² Kandi mati Yësu iya nenyè, ma kòlò tēmī vo kanye 'ba yèkèlu otra mo ehe iya henye, “Nani anza dē gērī mati zi me'do zi kyedre 'ba vo karase.”

²³ Yësu aya'ba dɔ mo iya henye, “Èzè miya wa maako ku na kyënyë, iya. Mora èzè anza dē, kö'du a'di otra ma?”

²⁴ Yësu gba na kida, ehe Anasi utu mo zi Kayafa kyedre 'ba vo karase.

Petero andi löhu na yɔɔ Yësu dē

(Mt 26:71-75, Mk 14:69-72, Lk 22:58-62)

²⁵ Mati Simona Petero èdī tɔɔ ani rē nī kubī, vidī maako ako'jo hɔ mo henye, “Anza kòlò tēmī vo lö'böwë 'ba Yësu?”

Löhu Petero andi ehe iya henye, “E e, manza dē.”

²⁶ Kòlò tēmī vo litu 'ba kyedre 'ba vo karase èdī ani. Mo na karo zi vo litu mati Petero ikye mbili mo yaga ne, ehe mo ako'jo henye, “Mongɔ yī dē mī yaka kora nani aba?”

²⁷ Löhu Petero andi, ehe zanga ayapa gbo.

Ika Yësu komo Pilato

(Mt 27:1-2, 11-14; Mk 15:1-5; Lk 23:1-5)

²⁸ 'Do nɔɔ damindö aba oba mati Yësu kazi Kayafa zi loko mati vo daliɔɔ mī turu 'ba Roma alima. Mora Yude biya èdīnnī bi kida aba yaga, ga kö'du èzè vidī tēmī zē i'bē mī loko ne, atayi na ti'da ehe ila mo dē zi wakonyo 'ba karama 'ba laga 'ba koli konyo.

²⁹ Pilato ayi yaga ehe ako'jo henye, “A'di ra na kyënyë ike kora nenyè?”

³⁰ Zē ya'bannī henye, “Mo vo kö'du kyënyë ko'do! Kö'du nenyè ra dika ze mo zi yī.”

³¹ Pilato ayada zi zë henye, “Obe mo ehe o'de vurë 'bomo mī kō'du kī'dī 'be.” Yude aya'bannī henye, “Danza dangölö aba zi kī'dī vīdī maako zi kofo.”

³² Ehe here, wa mati Yësu iya kō'du kyinë koli 'bëni, atayi tīnyö.

³³ Pilato i'bë hulëhu loko. Mo ako'jo Yësu zi nī ehe ako'jo henye, “Yī ra Yere 'ba Yude?”

³⁴ Yësu aya'ba henye, “Ēdī kō'du nenye ko'jo na bi dë yī, mandere vīdī maako ra ayada kō'du ma zi yī?”

³⁵ Pilato iya henye, “Ayolo ku manza dë Yuda! Vīdī 'bëyiyë ehe kyedree 'ba vo karase ra ikannī yī zi ma. A'di ra o'do?”

³⁶ Yësu aya'ba henye, “Kalakonda 'bama anza dë zi damöku nenye. Ēzë ëdī here, vo lö'bö 'bame ako'donni wehe zi sesi ma ta bi kī'dī zi vo dagba 'bezee. E e, kalakonda 'bama anza dë zi damöku nenye.”

³⁷ Pilato aya'ba henye, “Here, yī yere ra.” Yësu ayada zi mo henye, “Yī ëdī akiya henye, ma yere. O'jo ma mī damöku nenye, zi yada kō'du tīnyö ra, ehe vīdī mati zi kō'du ma tīnyö ayolo gu ma.”

³⁸ Pilato ako'jo ha Yësu henye, “A'di ra tīnyö?”

Ikye vurë zi Yësu kofo

(Mt 27:15-31; Mk 15:6-20; Lk 23:13-25)

Pilato i'bë hulëhu yaga ehe iya henye, “Mi'ja kora nenye dë kō'du kyënyë maako aba.

³⁹ Kyere ma 'duwī maboso kinga zi ye kadra karama 'ba laga 'ba koli aba, ombe zi ma kinga zi ye na dangölö Yere 'ba Yude?”

40 Zë agbögbö hë nnì, “E e, anza mo! Domba ze Barabasi.” Barabasi ëdì na vo wehe 'ba turu.

19

Ikye vurë ra Yësu zi tötö

¹ Pilato i'di kö'du gbö zi Yësu ku'bö so'da aba.

² Vo kanye o'donnì safo 'ba yere yaga tëmì ngora kono i'dinnì da Yësu. Here zë usunnì bongo 'buluyë rō mo.

³ Zë ayinnì zi mo da kyö ehe iyannì henye, “He, yì Yere 'ba Yude!” Zë isannì mo kpa kala nnì aba.

⁴ Kpa löhu Pilato i'bë yaga. Kadra nenye aba mo iya henye, “Ma kika Yësu zi ye yaga löhu, here atö'be kongö na bi de henye, mi'ja mo dë kö'du kyënyë maako aba.”

⁵ Yësu asi yaga usu safo 'ba yere kono bongo 'buluyë aba. Pilato iya henye, “Kinye kora ne ëdì.”

⁶ Mati kyedree 'ba vo karase ehe kanye 'ba yëkëlu ongonnì mo, zë agbögbö hë nnì iyannì henye, “Ma tötö mo da taka! Ma tötö mo da taka!” Pilato ayada zi zë, henye, “Obe mo, ehe atötöwë mo da taka. Mi'ja kö'du kyënyë ko'dö 'bomo maako dë.”

⁷ Yude nee aya'bannì henye, “Mo iya zi nì tēdì na Wisi 'ba Wiri! Kö'du kī'di 'beze iya henye, mi'di mo zi koli.”

⁸ Mati Pilato owo nenye, mo ndra na tere.

⁹ Mo i'bë hulëhu loko ehe ako'jo ha Yësu henye, “Yi ta kila?” Mora Yësu aya'ba dë.

¹⁰ Pilato ako'jo henye, “Kö'du a'di aya'ba da kö'du ko'jo 'bama ne dë? Ayolö dë mēdì kyigö

aba zi yi kinga na dangölö mandere yi tötö da taka?"

¹¹ Yësu aya'ba henye, "Ëzë Wiri i'di kyigo ne de zi yi, o'bo de wa maako ko'do zi ma. Mora mo mati i'di ma zi yi, o'do ndra na kyenyë."

¹² Here Pilato omba zi Yësu kinga na dangölö. Mora Yude agbögbö hë nni löhu, "Ëzë inga kora nenye ku na dangölö, anza de aboka 'ba Yere 'ba Roma. Vidi maako mati iya zi ni tedi na yere, vo wehe 'ba Yere 'ba Roma."

¹³ Mati Pilato owo nenye, mo ika Yësu yaga. Here mo alima akaño da kyiti 'ba vure bi mati ako'jo, "Yitö Dakaño." Mi ha 'ba Hibiru edi "Gabata."

¹⁴ Edi kaa kadra kutë mi ko'do, gba kazi karama 'ba laga 'ba koli, ehe Pilato iya zi vidi kayo nee henye, "Ongo bi da yere 'be!"

¹⁵ Zë agbögbö hë nni henye, "Ofo mo! Ofo mo! Atötö mo da taka!" Pilato ako'jo henye, "Here ombe ma zi tötö yere 'be da taka?" Kyedree 'ba vo karase aya'banni henye, "Yere 'ba Roma ra yere 'beze."

¹⁶ Here Pilato i'di Yësu gbo zi tötö da taka.

Atötö Yësu

(Mt 27:32-44; Mk 15:21-32; Lk 23:26-43)

Oba Yësu 'de,

¹⁷ ehe mo injë taka 'beni bi ma edi na yolo henye, "Yingo da." Ha 'ba Hibiru bi nenye, ako'jo "Gologota."

¹⁸ Ani atötö Yësu gbo da taka, ehe dakapa mo da taka, atötö kora kpa riyö, ma kölö kapa mo ma kölö, Yësu mi kutë zë.

19 Pilato i'di kö'du zi kö'du kyënyë ko'do 'ba Yësu zi yöru da wa ehe ki'di riyë da taka. Ako'jo henye, "Yësu 'ba Nazereta, Yere 'ba Yude."

20 Me'do ne ayöru mi ha 'ba Hibiru, ha 'ba Lateni ehe ha 'ba Girigi. Bi mati oba Yësu zi mo ne, anza na kowö ta ra gawo kyedre, ehe Yuda kayowe ako'jonnä kö'du yöru rö mo ne.

21 Here kyedree 'ba vo karase i'bënni zi Pilato iya henye, "Kö'du a'di ayöru henye, mo Yere 'ba Yude? Akayöru kyere henye, 'Mo iya zi ni tedi na Yere 'ba Yude.'"

22 Mora Pilato ayada zi zë henye, "Wa mati ma yöru ku, ma lima here!"

23 Tapëti vo kanye atötönni Yësu ku da taka, zë inyenni mi bongö 'bomo sowö, ma kölö zi ma kölö temi zë. Mora bongö 'bomo ma ta yaga o'do temi nzoyi bongö kölö, anza dë kapa maako aba.

24 Vo kanye iyanni zi oka ma kölö maako henye, "Dize dë, du'duwë födö aba zi kongö eyi ra akiri." Nenyë o'do rë ni here zi wayöru tayi tinyö, mati iya henye, "Zë inyenni mi bongö ame ehe u'dunni födö kö'du bongö ame." Vo kanye o'donni wa mati zë ombanni.

25 Ma 'ba Yësu owö dakapa taka 'bomo emi ni aba ehe Mariya mbara 'ba Kalapasi. Mariya Magadala edi kpa atowö ani.

26 Mati Yësu ongo ma ni, ehe vo lö'bö mati mo owö mo eti, mo iya zi ma ni henye, "Kora nenyë yaanya aba wisi 'beyi."

27 Here mo iya zi vo lö'bö ne henye, "Mo yaanya aba ma yi ra." Temi ndenyë dagba ani, vo lö'bö nani oba mo gbo lijo 'beni.

*Koli 'ba Yësu**(Mt. 27:45-56; Mk 15:33-41; Lk 23:44-49)*

²⁸ Yësu ayɔlo henye, yaanya aba ninde loo 'bëni ku. Ehe zi ko'do wayöru tayi tinyö, mo iya henye, “Ma na kodro.”

²⁹ Siko ëdi ani ndo a'ji aba. Vidi maako usu lifa mi a'ji ne ehe injë riyë i'di ha Yësu kaga 'ba isipo aba.

³⁰ Tapëti Yësu uwë a'ji ne, mo iya henye, “Wa biya o'do rë ni ku!” Mo umbi dë ni ehe oli.

Isi roto Yësu

³¹ Yaanya aba ëdi ko'do 'ba rako'jo, 'do ko'do 'ba ralawo ehe karama 'ba laga 'ba koli. Eëdi ko'do lele zi Yude, ehe zë ombanni dë zi ida ra nee zi lima riyë da taka mi ko'do nenyë. Here zë ako'jonnï ha Pilato zi ndi kora nee kowe ehe koba ida rë zë akaño.

³² Vo kanye dagba owenni ndi 'ba kora agamowe riyö mati atötö zë ani ne.

³³ Mora mati zë ayinni zi Yësu, zë ongönni mo oli ku nzo, ehe zë owenni ndi mo dë.

³⁴ Ma kölö tëmï vo kanye isi mbese Yësu wehe aba, yama ehe wini asi yaga.

³⁵ Da yolo nenyë ëdi tinyö, ga kö'du vidi maako ra ayada wa mati mo ongo o'do rë ni. Yaanya aba ato'bo tedi kpa koma aba.

³⁶ Biya nenyë o'do rë ni here, zi wayöru tayi tinyö, mati iya henye, “Yingo 'ba ida ro mo ma kölö akowe dë,”

³⁷ ehe “Zë ongönni ma kölö mi dakapa mbese mo isi wehe aba.”

*Kusu 'ba Yësu**(Mt 27:57-61; Mk 15:42-47; Lk 23:50-56)*

³⁸ Yosepa tëmī Arimataya ëdī kōlō tëmī vo lö'bō 'ba Yësu. Mo asesi na koho, le ga kö'du mo na tere kazi vo dagbe 'ba Yude. Mora yaanya aba mo ako'jo ha Pilato zi mo ida ra Yësu koba. Pilato i'dī dangölō zi mo, ehe Yosepa oba mo akaño ta da taka.

³⁹ Nikodimō ayi nī mo aba, ehe ika kpa kaa 'butëwota kilogaramo 'ba wakëzi ngutru aba o'do tëmī murë ehe aloyisi 'ba yöku kusu. Nenyë kpa te Nikodimō kōlō mati i'bë zi Yësu yondō kōlō maako aba.

⁴⁰ Vidi kora riyō nee, olonnī ida ra ne mī bongō 'ba yöku, bi kōlō wakëzi ngutru aba, mati ëdī hala Yude ombennī yöku 'bënnī.

⁴¹ Mī bi mati atötō Yësu da taka, ani yaka ëdī wogo aba mati gba ombe vidi maako dë mī mo.

⁴² Dawogo ne ëdī kara, ehe kyere ne kadra 'ba zi ra kö'jo kö'du ko'do 'ba ralawo, zë na korokoro zi ida ra Yësu ki'dī ani.

20

Yësu na didi

(Mt 28:1-8; Mk 16:1-8; Lk 24:1-12)

¹ Ko'do 'ba Gima aba njo mati bi gba na köndu, Mariya Magadala i'bë dawogo ehe ongo henye, yitō alulu ku 'de, ta ha bi tödu 'ba dawogo.

² Mo aho zi Simona Petero ehe zi vo lö'bō mati Yësu owo ehe iya henye, “Zë obannī Yere ku tëmī dawogo! Da yolo dë i'dinnī mo ku kila.”

³ Petero ehe vo lö'bō maako aba ayetonnī ti'bë dawogo.

⁴ Zë ahonnī ta bi kōlō, le vo lö'bō maako ne aho ndra ta da Petero ehe oko ani dagba.

⁵ Mo idē rē nī ehe ongo bongo konda na lala loko mī dawogo, mora mo i'bē dē loko.

⁶ Mati Simona Petero oko ani, mo i'bē mī dawogo ehe ongo bongo konda ne.

⁷ Mo ongo nzoyi bongo mati o'do zi komo Yēsu yofu mo aba ne. Akoku ku ehe mī bi mati na bi dē nī.

⁸ Vo lō'bō mati oko dagba ani ne i'bē mī dawogo, ehe mati mo ongo, mo oma.

⁹ Mī kadra nani Petero ehe vo lō'bō maako ne, ayolōnnī dē henye, wayōru iya henye Yēsu atēnyi na dīdī.

¹⁰ Here zē riyō ne i'bēnnī hulēhu zi vo lō'bō maakowe.

*Yēsu alaya zi Mariya Magadala
(Mt 28:9-10; Mk 16:9-11)*

¹¹ Mariya Magadala owo kudu yaga dakapa dawogo. Mo ēdī gba kudu, mati mo idē rē nī akaṅo

¹² ehe ongo malayike riyō loko. Zē usunnī bongo kanyi ehe ēdī alimannī bi mati i'dī ida ra Yēsu 'domo. Ma kolō bi do mo ehe ma agamo bi ndī mo.

¹³ Malayika nee ako'jonnī ha Mariya henye, “Kō'du a'di ēdī akudu?” Mo aya'ba do mo henye, “Zē obannī ida ra Yere ama ku 'de, ma yolo dē i'dinnī mo kila.”

¹⁴ Kandi mati Mariya iya nenye, mo ofo rē nī kpo ehe ongo Yēsu ēdī atorō ani. Mora mo ayolo dē, mo 'bēnī ēyī.

¹⁵ Yēsu ako'jo ho mo iya henye, “Ēdī akudu ga a'di? Ēdī ēyī ra koma?” Mo asōsu 'bēnī mo vo kyeti yaka ra ehe iya henye, “Kyedre, ezē obe

ida rɔ mo ku 'de, ako ayada zi ma, here ma tɔ'bo ti'bē mo koba.”

¹⁶ Here Yēsu iya zi mo henye, “Mariya!” Mo ofo rē nī ehe iya zi mo henye, “Raboni.” Ha 'ba Hībiru aba “Raboni” vo “Komoyandi.”

¹⁷ Yēsu ayada zi mo henye, “Ise ra ma dē! Mī'bē dē gba zi 'Bu. Mora ayada zi vo lō'bō 'bame mēdī ati'bē zi mo mati na 'Bu ma ehe Wiri 'bama, kpa 'Bu wē ehe Wiri 'be.”

¹⁸ Mariya Magadala i'bē ayada zi vo lō'bōwē nongɔ Yere ku. Mo ayada kpa zi zē wa mati mo iya zi nī.

Yēsu alaya zi vo lō'bō 'bēnyē

(Mt 28:16-20; Mk 16:14-18; Lk 24:36-49)

¹⁹ Vo lō'bōwē na tere kazi vo dagbe 'ba Yude, ehe mī hutaga 'ba Gima kōlō nani, zē isi gē nni loko. Truku'du, Yēsu alaya mī kutē 'ba gboko. Mo amētē zē iya henye, “Rakyēyī mēdī yē aba.”

²⁰ Ehe ayada kala nīyē zi zē ehe mbese nī. Mati vo lō'bōwē ongōnni Yere, zē biya na rakyenyi.

²¹ Tapētī Yēsu amētē zē lōhu, “Rakyēyī mēdī yē aba,” mo iya henye, “Mēdī yē kutu kaa 'Bu utu ma.”

²² Here mo alawo dē zē ehe iya henye, “Iriyē Lawo Laka.

²³ Ezē ile vīdī maako ku ga kō'du kyēnyē, akila zē. Mora ezē ile kō'du kyēnyē 'bēzē dē, ila zē dē.”

Yēsu ehe Toma

²⁴ Toma ma ako'jo “vo loŋa” ēdī le kōlō tēmī vo lō'bō 'butē dōmorīyō, mo anza dē agamo eti mati Yēsu alaya zi zē.

²⁵ Here zë ayadannī zi mo henye, “Dongɔ ze Yere ku.”

Mora Toma iya henye, “Dagba, momba kongɔ tēpī ɔɔ 'ba nosomari mī kala mo ehe kise zë dawisi kala ma aba. Ma kī'dī kala ma bi mati wehe i'bë da mbese mo. Moma dë, nje ëzë mo'do nenye ku!”

²⁶ Tapētī ko'do 'ba Gima kōlō yaa, vo lō'bō atoto rē nnī löhu bi kōlō. Kadra nenye aba, Toma ëdī zë aba. Yësu ayi loko mati ha loko gba na kisi ehe ɔɔ mī kutë 'ba gboko ne. Mo amëtë vo lō'bō 'bëniyë, “Rakyëyi mëdī yë aba.”

²⁷ Mo iya zi Toma henye, “İ'dī dawisi kala yi kinye, ehe ongo bi da kala me. İ'dī kala yi da mbese ma. ɔɔ tēmī da jiji 'bëyi ne, ehe oma!”

²⁸ Toma aya'ba do mo iya henye, “Yi Yere ama, ehe Wiri ama!”

²⁹ Yësu iya henye, “Toma, oma ga kö'du ongo ma ku? Vidī mati ëdinnī koma aba mī ma kazi ma kongɔ, ëdī zë mati tinyö ya'da aba!”

Kö'du a'di Yowani Ayöru Buku Ëni

³⁰ Yësu o'do kyinë 'ba kö'du koro ko'do maakowe kyɔ mati vo lō'bō 'bomowe ongonni, ehe anza zë biya ayöru ku mī buku nenye.

³¹ Mora ma nenye ayöru here zi ye kī'dī koma 'be mī Yësu na Korisito ne, Wisi 'ba Wiri. Ëzë ëdiyë koma aba mī mo, atëdiyë dīdī aba mī ru 'bomo.

21

Yësu alaya zi vo lō'bō 'bëniyë

¹ Yësu yaa alaya zi vo lö'bö 'bëniyë da göti Föfö 'ba Tiberiyasi. O'do rë nï mï gëri henye.

² Simona Petero, Toma ma ako'jo “vo loṇa,” Natanëlë ta Kana mï Galilaya, gisi 'ba Zebedeyo ëdinni ani, bi kölö aga vo lö'bö maako ëti riyo.

³ Simona Petero iya henye, “Mëdi ti'bë kyenze kiri!”

Maakowe iyanni henye, “Da ti'bë ze yi aba.” Zë i'bënni yaga mï tönjö 'bënni. Mora du irinni wa maako dë yondö nani aba.

⁴ Njö mï damindö vere, Yësu oṛo da göti, mora vo lö'böwë ayolönni dë mo eyi ra.

⁵ Yësu agbögbö hë nï, “Aboke, iriyë wa maako ndö?” Zë aya'banni henye, “E e.”

⁶ Here mo ayada zi zë henye, “Umëë öndu 'be ne akaṇo da kala tiri 'ba tönjö 'be, ehe akiriye kya 'ba kyenze maakowe.” Zë o'dönni here, ehe öndu gbö kyö na kyenze, here zë o'bönni dë zi koto riye mï tönjö.

⁷ Vo lö'bö mati Yësu oṛo ne, iya zi Petero henye, “Nenye Yere ra.” Mati Petero owo ne Yere ra, mo usu böngö mati mo oto, mati mo ëdi löö ko'dö ne. Here, mo öfu mï wini.

⁸ Tönjö ëdi nje kaa lamikölö mitiri ta da göti. Here vo lö'bö maakowe alimanni mï tönjö, ehe otönni öndu mï mo kyö kyenze aba.

⁹ Mati vo lö'böwë asinni yaga tēmi tönjö, zë ongönni mangöb'bo ehe wa'do 'ba kalili kyenze aba dö mo.

¹⁰ Yësu ayada zi vo lö'bö 'bëniyë henye, “Ike kya 'ba kyenze maakowe mati iriyë ne.”

¹¹ Simona Petero i'bë hulëhu mï tönjö ehe oto öndu da göti. Mï mo kyenze ma kyedre ëdinni

lamikölö 'butëmuyi dómowota, mora öndu gba kazi liza.

¹² Yësu iya henye, “Ayiye ehe onyowe.” Mora vo lö'bö ma kölö maako ako'jo dë, mo ëyi ra. Zë ayolönni mo Yere ra.

¹³ Yësu oba mangölo'bo mi kala ni ehe i'di kya maakowe zi vo lö'bö 'bëniyë. Mo o'do kyenze ne kpa te here.

¹⁴ Nenye mi kadra mawota mo ra Yësu alaya zi vo lö'bö 'bëniyë tapëti mo ënyi tëmi koli.

Yësu ehe Petero

¹⁵ Mati Yësu vo lö'bö 'bëni ëti indenni wakonyo ku, mo ako'jo henye, “Simona wisi 'ba Yowani, ɔwo ma ndra ta da oka maakowe?” Simona Petero aya'ba henye, “Ɔɔ, Yere, ayölo ku mowo yi!” Yësu iya henye, “Here, ulu timëlë ame.”

¹⁶ Yësu ako'jo madariyö mo, “Simona wisi 'ba Yowani, ɔwo ma?” Petero aya'ba henye, “Ɔɔ, Yere, ayölo mowo yi!” Yësu ayada zi mo henye, “Here, ongo ga timëlë ame.”

¹⁷ Yësu ako'jo mi da mawota mo henye, “Simona wisi 'ba Yowani, ɔwo ma?” Petero na rasösu ga kö'du Yësu ako'jo ho mo mawota ëzë mo ɔwo ni. Here mo ayada zi Yësu henye, “Yere, ayölo kö'du biya. Ayölo mowo yi.”

Yësu aya'ba henye, “Ulu timëlë ame.

¹⁸ Ma yada tinyö zi yi henye, mati yi gba na wisi kora ɔbi, usu rë yi ehe i'bë bi mati omba zi ti'bë. Mora mati endro ku, akiza yaga kala yi. Here, maakowe akidanni ko'di gë yi toko rë yi ehe akalëpi zi yi dagba bi mati omba dë zi ti'bë.”

19 Yësu iya nenye zi yada hala Petero akoli ehe akika wayeto zi Wiri. Here mo iya zi Petero, “Usu ga ma.”

Yësu ehe vo lö'bö maako eti

20 Petero opi rë ni ehe ongo vo lö'bö mati Yësu ongo ne, usu ku gë ni. Mo ra kpa te mati alima kara zi Yësu bi 'ba wakonyo, ehe ako'jo henye, “Yere, eyi ra edi ti'be zi yi susu?”

21 Mati Petero ongo vo lö'bö nenye, mo ako'jo ha Yësu iya henye, “Yere, a'di kö'du mo?”

22 Yësu aya'ba henye, “Kö'du sösu 'beyi edi a'di, ezë momba mo zi lima le ma'ba? Usu ga ma.”

23 Here, ndondo apere rë ni mi kutë vo lö'bö maakowe henye, vo lö'bö nenye oli dë. Mora Yësu iya dë mo oli dë. Mo iya nje henye, “Kö'du sösu 'beyi edi a'di?”

24 Vo lö'bö nenye ra mo ayada kö'du nenye biya. Mo ayöru, ehe da yolo mo edi kö'du tinyö ra yada.

Ndundu mo

25 Yësu o'do wa maakowe kyö. Ezë ayöru zë biya mi bukuwë, ma sösu henye, bi atanza dë mi damöku ne kö'du buku nee biya.

lxxxv

Morokodo
Portions of the Holy Bible in the Morokodo language
of South Sudan

copyright © 2010 Pioneer Bible Translators

Language: Morokodo

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 18 Apr 2025 from source files dated 29 Jan 2022

b81b7ca7-810b-5cb2-913f-b28f08d9c01d